

晚晴
籀詩匯

第三
三册

晚晴縵詩匯卷八十四目錄

紀淑曾 八首

王時亮 一首

鄧獻璋 二首

周鼎樞 二首

朱休度 七首

文上杰 一首

賈虞龍 九首

胡蔚 二首

郭同芳 一首

楊瑞 三首

楊屋 十首

孫起棟 二首

莊培因 三首

倪承寬 一首

汪永錫 一首

戈源 一首

曹學閔 六首

查善長 二首

于宗瑛 一首

胡紹鼎 五首

顧鎮 一首

葉佩蓀 五首

沈業富 二首

李夔班 一首

黃惠 五首

周春 一首

張湘 二首

陸耀 五首

甯楷 二首

梁肯堂 二首

劉秉恬 一首

畢廷斌 二首

蔣業晉 五首

鞠悞 一首

盛百二 二首

蕭霖 四首

李天英 三首

覺羅成桂 二首

周得壽 一首

何在田 七首

晚晴移詩匯卷八十四

徐世昌

紀淑曾字衣孟號秋槎文安人乾隆癸酉舉人歷官湖南鹽法長寶道有漢皋集

詩話秋槎宰長陽牧沔陽守漢陽斷疑獄捍水患深
有惠於民分巡辰沅永靖迭攝藩臬兩司以母老乞
歸詩清遠高曠得山川之助爲多

兩夜同牧原

急風催暝色和雨到庭柯寒近窗前蚤愁如葉下多田園
催晚節江水漲微波相慰渾忘寐孤鐙耿薜蘿

庚子秋姚雪門學使將赴都門贈別

帆影破湘煙春深古驛前西窗話遙夜南國喜涼天交意
淡如此客心愁黯然江頭花月夕強半是離筵

八月猶餘熱清尊昨日開江聲兼雨至嶽色隔城來虛館
穿花樹生香落酒杯阿誰歌水調惆悵鬢毛催

再送牧原

大別山前春水長伯牙臺畔早梅香君今買櫂去沙渚我
亦迴車思故鄉江上離筵驚草草夢中白日過堂堂鹿門
煙樹春明月小立東風淚幾行

和顧牧原舟中見寄原韻

青山白浪晚崢嶸愁指寒雲是去程天上星辰勞北望舟
中兒女倦西征夕陽郢口帆初卸野岸椒盤歲又更獨對
庭梅思折贈夜窗風雪暗孤檠

晴川西望渺春波卻喜移家野興多近市山亭開甕酒種
花門巷繞梁歌凍雲回首江頭別芳歲驚心客裏過漫擬

忘機去沙渚竹煙深處鳥聲和

九日嶽麓登高薄暮渡江卽事

嶺雲汀樹總宜秋
九日新晴作勝游
亭倚山腰低萬壑
帆隨洲影翦雙流
澄江亂下漁人網
飛蓋遙迎水驛樓
詩境蒼涼殘醉裏
菊花天氣木蘭舟

寄軒卽事用王少林韻

江上人家柳罨汀
寒山繞郭暮煙青
蘭前一片瀟湘色
落日秋心滿洞庭

王時亮字寅蒼臨淄人
乾隆癸酉舉人
歷官衛輝知府
有紫泉吟詩藁

游山歸途作

回首山中路
茫茫煙欲封
前村數點火
遠寺一聲鐘
權響

冰生渡林明雪壓松定知今夜夢猶自繞諸峯

鄧獻璋字方侯一字硯堂祁陽人乾隆丙辰舉博學鴻
詞癸酉舉人由教諭歷官渠縣知縣有萬花書屋棗
秋日早發尉氏縣

尉氏征鞍早行行入畫中深煙連斷岸斜月澹疏桐驢背
霜華冷雞聲夢境空東偏村落曉柿葉爛秋紅

都門送劉芳玖之官蜀中

青天不易上蜀道古來難十二巫峯裏飄然寄一官雨雲
行處幻琴鶴坐邊寒明歲北歸雁煩君寄羽翰

周鼎樞字凝甫號榆所嘉善人乾隆癸酉舉人官武功
知縣有清聞齋詩存

爛柯山

石梁橫亙如長虹，青芝白石披蒙茸。不知何年策爾五丁力，天驚石破懸玲瓏。我來山中秋已杪，山前木落禿如掃。不見當年伐木人，空餘斷碣橫秋草。盤盤一徑入空青，欲散不散煙冥冥。日月雷雨走其下，龍歸時復聞羶腥。俯視鱗鱗見城郭，曠哉天地何寥廓。仙子樵人雖不存，已覺胸中去黏縛。吁嗟乎神仙之說亦太奇，殘星半局滄桑移。摩挲石枰三太息，松風浩浩雲霏霏。

未歸

楊柳陂頭日問津，蕭然猶是未歸身。愁中詩句真佳友，客裏青氈似故人。時務策成安命薄，絕交書至悟家貧。白沙翠竹秋江路，思得漁童捧釣綸。

朱休度字介裴，號梓廬秀水人。乾隆癸酉舉人，官廣靈。

知縣有壺山自吟豪

詩話梓廬爲文恪裔孫淵源家學博涉多通晚年自言困於簿書詩思如黃楊厄閭不復能生發極其分不過如南宋金源最小家之一鱗片甲譽之者謂其晚律之細已入老杜之室語皆過當律以宋金不失爲廬山淫水之遺

扶筇

老催花事減春惱病懷深
小雨遲晨起殘紅入暮陰
天涯芳草夢身外野雲心
俯仰茫茫裏扶筇一短吟

冬夜偶成

何心出岫落窮邊
枯盡形容白盡顛
野有流亡少長策
家無儋石況殘年
愁併塞北風號夜
夢斷江南水接天
卻羨黃州員外置
閒居尙食酒囊錢

登嶽同黃刺史照作

桑乾外抱東北奔抱內山者水名渾渾河一委承八源逆
西南流桑乾吞八源所出勞難論絡嶽之腋灑嶽跟跟有
一峽水潺湲架水作棧梁鼉鼉懸壁之下厚陰昏背入腰
轉攀天門無數山壅困廩屯五臟六腑互爲根嶽包如心
臟腑君厥心中空厥頂髡勢兜左右微輕軒形家乃以鉗
爲言直言導脈從崑崙萬里入首臨中原泰山如坐嵩如
蹲如行如立衡華騫此山獨卧自然尊石不璫瓏草不蕃
太樸一氣稟混元周三千里蟠外垣錐指之地太極存上
應虛危擘中分壁開如幃如缺盆負陰抱陽向午瞰直午
一峯如守闈貪星變廉火焯焯丙張丁柳無偏反天造地
設非強云柰何立廟羞蘋蘩昧厥宅中旁是援當年議祀
聚訟紛曲陽飛石証愚愔只今懷柔百禮惇明禋釐正神

所欣那更遷廟移鐘鼓宅幽都正如中軍如人坐車前式
轅還元洞封靈寶文會仙府集羣真旛僊之人兮渺白雲
兩伯之樂何處聞仰瞻俯睇盪心魂側身懷古蒼煙痕黃
君守上古洽敦神之聽之民無冤邀我登嶽謁帝孫題名
嶽壁聯篋塤勸我作歌辭復溫我無筆力扛鼎翻敢繪日
月摹乾坤昌黎遺誠時乃諉雖欲悔舌不可捫

始游南山寶峯寺

一塢如兜向北東中有如毳千萬松兜作佛坐坐銜月毳
作山衣衣滿風塞山誠比體頑劣不蕃草木山山童誰料
碾礮碗碗裏居然小窟藏瓊瓏從山左臂盤盤入忽入大
癡圖畫中嵐浮翠暖麗如許銀海光刮金篋功若移寶地
置通邑早誇勝概題名公乃今埋沒久無問非爾縣官誰

則從吁嗟乎縣官之俗俗難醫縣境之陋陋於夷餓隸如
鬼鞭之叫逋糧如山責之疲惟習虛文畫尾諾了無實政
蘇邊黎居如籠繫城如斗閒行寂坐愁容癡今朝跨馬得
來此無小無大生歡喜相與俗吏湔厥腸更教陋邦洒其
恥不聞坐上龍眠客有言我今恍惚還家矣

寄題龍谿黃氏璞園學舍園在黃石齋先生鄴山書

院之旁

有明熹廟壬戌科先公典試人材多漳浦黃公出門下匣
開虹見騰太阿海南碩果讀書種凜凜氣節堅不磨傳道
鄴山講學處堂三亭五流絃歌百年舊基廢復舉先型遺
愛神人呵乃有江夏令兄弟聞風興起勤規摩增置園亭
作學舍分巖絕壑依陂陀茲山奇麗富景色背負峯面橫

江波朱明洞開返照入赤城標建晴霞拖翠疊紅稠錦繡
谷武夷九曲無或過嗚呼黃公生逢百六運不廢禮樂因
干戈三易羣經有述作疏說貫申祛其訛況今清晏尙儒
術禮門義路平不頗後生游談但束閣誰溯後海窮先河
璞園之作志景仰用意非獨耽煙蘿學比登山互鞭策工
得居肆羣切劘連屋之書拂雲樹詎讓山林人姓何我少
失學老而悔誦芬詠烈慚顏酖萬里題詩感離索夢入幼
塾還嘉禾焉得雙翅奮閩海游焉息焉安樂窩

忻州汪刺史重修元遺山墓於草間獲斷碑搨以見

寄感賦長句

刺史行部春郊路路前有冢冢無樹石人石獸知何代紫
煙結莽埋春霧下馬來尋斷碑露碑表七字摩窠書乃是

詩人元遺山之墓魏初姜彧記碑陰先生遺命弟子注陰
云彧與初嘗辱先生教誨又聞先生之言某身死之日不願有碑誌也墓頭樹三尺石書曰詩人元遺山之墓足矣
彧與初適按部河東得拜墓下因買石刻之時至元十九年不書官爵不題名中原布
衣了半生百年風雅中州集一代典章野史亭乾坤清氣
最難得斯文自任誠非輕嗚呼龍蛇爭鬪山河頽銅馬紙
薦成燼灰虛名誤人生百謗寫到蘇詩肝肺摧肯作中書
褚淵活共諒江南庾信哀刺史修舉職所專重扶墓碣樹
墓田補以松柏年蔭年我讀汴京亂後諸詩篇其聲幽咽
情渺綿夢中青山與黃葉愁裏殘陽更亂蟬杏園雙燕巢
何處秋水鳴蛙命可憐此身春草惟一醉此夜寒灰甯復
然詩人心事杜鵑血獨恨無人作鄭箋

縣諸生十數輩送余至蔚州之暝泉村越旦暝泉人

復爲余設餞堡門外遲回久之而別

塞晚秋日澹邊寒秋雲凍惻惻背風催宛宛手條弄天色
黯將收人情苦遠送送我到暝泉揖讓諸生眾周旋不能
捨翦燭連牀共杯盤旣狼藉笑語復喧鬩泉暝情益暝終
宵詎成夢明日村之人出餞道旁供謂言侯聲名耳習鄰
邦重侯惠波及我愛我息我訟感侯不能已轍酒中誠貢
聞言驚下馬嗟勞久停鞚迴頭別諸生拭淚心餘恫去去
午影斜忽忽朝醒中老眼醉生花一派野煙霧

文上杰字冠南善化人乾隆癸酉舉人官會同教諭

過龍洞口占

古洞一村煙風光瞥眼前綠陰濃野樹春意動山泉僧踏
雲邊路人耕雨後田碧桃開兩岸誰權武陵船

賈虞龍字舜臣號雲城漢軍旗人乾隆癸酉舉人有謙

益堂詩鈔

詩話舜臣生於乾隆元年丙辰卒於乾隆辛巳年僅二十六詩藁爲其繼配劉所藏其猶子文焯梓以傳世舜臣與王夢樓最善袁簡齋謂其詩尤工七古

秋雨懷朱竹君

晨興步平野天風澹容與木葉隨征鴻哀蛩泣秋雨騁目
意所愜返觀默無語懷哉生平人亭亭獨延佇

同顧備九彭晉函姚姬傳朱竹君陳伯思仲思游三
貌庵看菊花歸於伯思處小飲

天高寒雲輕日瘦秋氣老驅車出郭門枯槐夾古道細雨
溼征鞍風來颯然好偃仰羣牛羊疊疊藉衰草霜凌百物
殘茲游苦不早爽塏亦足樂何用怨枯槁

明時雜詩卷之十一
古寺鬱嵯峨塗飾雜丹黼伊誰實經營莊嚴供千佛老僧
出迎門導我入禪室語以種植能至理亦超軼蒔花何必
多往往有奇術

琉球刀歌

天吳翻風立海水老鮫跳波翦長尾殷殷空山霹靂聲飛
來海客鑪中死鑪中冉冉浮炎煙迺厲迺鍛成三年銛鋒
照川霜雪白寶鏑出匣芙蓉妍黃雲崢嶸天宇廓陰森日
暮精靈躍奇氣能教山魅愁寒芒欲逼天星落神物所屬
非人求會合亦似鍼磁投遠從鼈背踏滄海攜來萬里沙
棠舟出鞘蒼茫對晴昊百感無端入懷抱十年磨刃贈何
人夷門古路生秋草

秋日

涼風吹側帽獨上最高樓眼底誰知已天涯又暮秋平蕪
雙落雁野渡一孤舟太息歲華晚清光不少留

王夢樓齋中夜話

舉世包容久諸公泛愛多有懷宜對酒無地敢悲歌抗疏
欽劉向輕身恥卞和涼颼聽漸瀝獵獵打枯荷

黃葉愁風雨青山感歲華年來貧到骨久住卽成家奇數
眞三黜吟情尙八又多君車笠意深夜笑言譁

萬柳堂懷古

廉公清興酒顏酡紅豆拋殘白紵歌三疊笙簧雲外散六
朝煙雨夢中過尊前秋水開蟾鏡檻畔山光淡綠蛾惆悵
更無花解語高樓凭徧晚風多

堂開綠野侑嘉賓相國齋居列錦茵文獻有靈關氣數山

川生色仗詞人百年鐘鼎悲流水萬里風雲隔去津偶爾
登臨搜屐齒年年花鳥不知春

胡蔚字少霞一字羨門無錫籍武陵人乾隆癸酉拔貢

南河候補同知有吹萬樓集

詩話少霞爲復齋中丞子復齋晚年嘗居惠山少霞
卽著籍焉故家中落棄官游滇南孫補山相國延主
昆明書院居數年卒於滇徐兩松中丞爲葬於昆明
城北婦王知書能詩爲守墓弟子蒙化彭壽爲刻其
集粵中

謁萊陽二姜先生祠

浩氣神明在孤忠史册存墓田滄海遠雲木敬亭昏死亦
全臣節生猶哭主恩還聞魏冰叔直筆洗煩冤
末劫何多難曾聞魯兩生艱難豺虎日生死弟兄情故社
悲荒蔓遺民惜老成青山留廟祀憑弔涕交橫

郭同芳字希仲號翊清濰縣人乾隆癸酉拔貢官直隸
趙州州判

秋日雜詠

縱不思家也惘然難禁蕭索九秋天花如故國黃無恙髮
比來時白可憐人得清閒宜命酒官當寂寞似參禪新詩
題向開元寺誰覓紗籠待客還

楊瑞字覲班號香崖龍陽人乾隆癸酉拔貢官安仁教
諭有香崖詩集

惜桃花

城南斜日桃千樹細騎輕筇此中去近橋一樹紅不同立
盡東風嬌欲語路迴疑入武陵溪寺近錯認元都非明霞
攢簇疑無路胭脂小片沾人衣風風雨雨勢太惡昨日花

開今日落花開花落花豈知楚血湘魂共蕭索可憐豪華
滿眼新明珠金雁成埃塵曉露滴殘金谷月夜烏嗁斷玉
樓春玉樓金谷人幾在明歲花開顏不改綠茵踏藉爭肯
來華髮淒涼不相待當時游侶盡能詩意氣傲兀傾豪厄
一曲遙聞折楊柳黃驄陌上誰家吹月澹煙疏一搔首浩
歌且盡湘醪酒

由湘潭入衡山

浮家非得已幽事愛江鄉山郭明殘黛人家半夕陽浪吹
魚子細夢近蓼花涼亦抱圖經看蒼梧望渺茫

晚過塘山口見河柳離披感賦

無復江干小泊期記曾相見憾遲遲十分宛轉隋宮夢一
段蕭騷灞上詩落日殘鴉流水外斷雲微雨暮帆時不知

誰解黃驄曲十月河梁又別離

楊屋字子載號恥夫南昌人乾隆癸酉拔貢有恥夫詩

鈔

彭芸楣曰子載詩清氣盤空自出機杼其得之天者厚矣然非胎息風騷淵源漢魏胡以神味氣韻駸駸入古符南樵曰恥夫世爲雅州士官天全宣慰使雍正戊申隨父大業受宅南昌性喜爲詩邊徽奇才也其南州燈詞洪州新樂府獨冠一時七古縱橫跌宕七律音節蒼涼卒年僅三十二詩話恥夫詩清越激宕而音節近唐人不落宋派彭文勤蔣心餘皆重之遺詩卽文勤所定心餘有詩哀之云新詩自淘鍊收束筆逾陡一語盡其造詣會賓谷編江右八家詩鈔曰陳伯璣會庭聞蔣心餘趙山南汪輦雲帥伯子何鶴年恥夫其一也

同蔣心餘彭芸楣游北蘭寺

無數征帆向馬當龍沙北去樹蒼蒼去年君亦他鄉客此日誰傾地主觴野渡春風歸鳥雀寒山返照下午羊贊公

去後風流盡依舊閒雲鎖竹房

棧道猿聲歌

猿朝鳴猿夜鳴勸君乘舟毋陸行頃刻葬魚腹肢體猶得
全懸崖一墜血稠疊野狐生啖目眇眇劍門插天青噴岷
行人但左擔轉趾不易肩穹岫置傀儡來去導行人去挾
木人去來挾木人還木人不見人不前不者對死脚躡間
猿鳴苦猿鳴酸江南苦秋熱邊氣早淒寒秦時燒棧至今
在八月積雪橫雲端早捫狸跡爭追攀裂膚墜指心猶歡
今年墜崖不知處明年下視枯骨荒草纏君不見陰平天
險不可當魏人下令如驅羊一落千丈血裹瘡回看棧道
我心傷艾艾西來功可王胡不錦衣歸故鄉

題家藏仇十洲畫馬

官馬滿櫪一匹無手持尺絹走且呼老奴旁捋白髭鬚此
馬甯與凡馬殊可記當年全家遷播下成都郎君初騎果
下馬青絲絡頭老奴扶就中主人汗血駒垂鞭緩轡從者
趨指似此馬百不如何不出易斗米供朝餽我憶仇英下
筆時全身學馬無不爲身不著地頭尾躡馬仰視天鬃橫
披叱之不起神猶夷四圍淺草官無笑嗟我八千里外身
孤羈道逢駑馬不能騎無人知是邊城兒

泰西畫人物田舍一幅自蜀攜來十餘年矣重加裝
潢以詩誌之

橫得二尺縱一尺樹裏人家好風日喬木拔地雲蒼茫籬
落兩圍中牛羊草木辨色如籬長牛羊隱見風低昂屋北
似是打稻場桑梯不取倚壞倉誰其牧者三河羌前顧後

侶歸不忙此中雖樂非吾鄉卧龍山下春射獵父手射鹿
飲鹿血父膝坐我指我嘗父今黃泉母白髮南遷得授灌
鄉田力田孝弟身手閒丈夫躬耕豈足恥我有天子憐飢

寒

內遷南昌蒙賜
田一頃宅一區

梅嶺懷古

路入雄關鳥道斜參天古木暮雲遮樓船是處思名將逢
掖當年走傳車氣候何須異寒煖山川今已入中華雲開
百粵層城遠獵獵風迴卷白沙

雨中過鬱孤臺

雁聲蕭颯過江來江霧沈沈雨不開嶺外梅花飛作雪春
風空鎖鬱孤臺

宣德賜印歌

往見一牙章文曰妙悟莊嚴陰誌宣德
二年賜刺麻刺幹藏下蓋明錫番僧印

也

蠻夷識印不識字錫以牙章靖邊事紅帽黃帽呼萬歲刺
麻子孫印世世貢表押印朱模糊褊袒纓絡來渡瀘入抱
氈毼謁天子出分金帛歡妻孥大印小印不知數鴟夷懸
之碣房貯石龕生受旃檀香手炙肥健唱經去忽聞銀官
來貨場紅帽黃帽刀交光天兵直入法王死碣房爭取金
銀章此印流傳入中土驚雷一聲花一吐塵埋古寺寶幢
光血漬車輪高紐古我聞刺麻呼法王青獅白象雲相羊
前朝眩術感佛國羣僧雜出雄蠻方舉手加額日入部左
擔崎嶇棧飛渡駟馬諭蜀來相如萬里不毛皆貢賦

康郎山懷古

白浪連天地蕭條戰伐塵驅除民有主割據爾何人百戰

艱窮寇諸公解致身由來開創業草木亦能神

題蔣茗生歸舟酒醒圖

桑乾霜葉打征衣柳壓秦淮白雁飛煙月五更停欸乃江
山萬里見庭幃入秋天氣多沈醉送別鄉人羨早歸此日
仲文橫錦瑟不從簾外問湘妃

黃頭慵起挂帆遲酒渴鐙殘卷畫帷多病賁郎難諫獵同
舟小婢定能詩何時富貴歸須早如此風波醉不辭一樣
碧桐宮井意重教舜舉寫烏絲

錢舜舉有張麗華侍女汲井圖甚工

孫起棟字天擎號白沙新化人乾隆癸酉拔貢有遼西

湘南諸集

詩話白沙傲岸負氣乾隆己卯坐科場事讎戍至嘉慶初始放歸歸後無以爲生客粵西快快還里中途遇盜盡沒其詩文集以去憤甚死東安旅店其遇窮矣詩偏強生硬如見抑塞磊落之概

寄頴上王晉齋令長

我有故人潞河涘不見紫芝厯三紀俟河之清壽幾何川
原浩浩沈雙鯉昨來倏遇城南杜名父之子來古戍爲訊
東牀王會稽鬮縷粗得知其故棲枳鸞鳳亦不辭身騎土
牛又何遲將毋誓墓如羲之貪冒苟進非所期祥符相握
天下砥東南民力歎竭矣一命愛物必有濟矧乃郎官宰
百里六一翁與玉局翁聚星禁體雪花中廿年清頴落君
手知餘賦筆聲摩空我來卅載墜苦海桐根半死嗟猶在
埋愁無地鬢毛空惟有恆河性未改卻憶玉堂金馬客迴
翔久絆王喬鳥念我虛吟絳蠟紅祇今未許烏頭白我有
敝帚千金賞欲付梓人勞悵望有大力者負之趨得不飛
書去頴上此生歸路轉茫然狐豹邱山絕可憐何日與君

賦泛頴相將轟醉西湖邊

和幼梅抵臨榆見呈

相逢一笑兩飄萍絮語連宵到曉星
衰朽吾慚照夜白俊才弟似海東青
危炊久淅矛頭米短劍今來老上庭無
限淚河流不盡未乾蠟炬共熒熒

莊培因字本澗一字仲澗陽湖人乾隆甲戌一甲一名

進士授修撰歷官侍講學士有虛一齋集

詩話仲澗爲南村次子兄方耕乙丑一甲第二仲澗
一甲第一皆進呈御覽時由二甲拔置一甲者仲澗
於傳臚前一曰值久旱得雨高宗大喜顧侍臣笑
曰可謂狀元雨矣伊稔平定上詣闕里告成仲澗
與少司馬兩錢公同派隨駕恭和御製題三人同於
途次口占人指爲馬上詩壇朝廷舉行慶典自祭告
天地宗廟山川百神與夫內外臣工褒卹碑祭諸文
多出其手一時文名藉甚然觀其詩殊少佳作而恭
和御製詩又居大半劉召揚謂此卷爲詰詞葆琛所
裒集大概從計車北上及需次春明時在舊交中蒐

羅而得者居多
非其全豹也

立秋日效陶徵士體

孟秋雨初霽涼颺綠窗虛溽暑漸欲闌始覺夏葛疏莎雞
吟砌間水衣上庭除感時意不昧惜日情所紆開軒挹新
爽散帙窮居諸晤言一室中游心太古初俯仰浩無慮密
爾以自娛

閒居屏人事與世安所乖圖書盈我前卓犖平生懷寥寥
天宇澄高秋氣彌佳何以寄真想遠在山水佳枯桐聊可
揮澹泊古與偕諒非悅耳聲因之素心諧

青石梁

石梁積空霧策馬穿宿障一徑迴入幽兩壁儼相向攀援
窮上躋彳亍怯下望纔過登厯艱始覺宇宙曠朝霞忽爭

飛變幻非一狀獨樹綴高嶺殘雲帶連嶂卽目信多奇塔
焉效天放

倪承寬字餘疆號敬堂仁和人乾隆甲戌一甲三名進
士授編修官至倉場侍郎有春及堂詩集

盱眙縣懷古用杜工部九成宮韻

盱眙南山湄泗城浸如白雉堞宛然圍流波蕩缺口城心
矗浮屠晃朗存戶牖想當水未瀦山城大於斗洪濤傾天
吳巫支祁駭走遂使婦子居竟作蛟鼉藪導川順水性神
禹功不朽水由地中行妙用傳希有後乃違厥度湮水水
失守宣防英喆能法鑿千載後長空松風迴憑軒惆悵久
掘地伊何人注海重搔首

汪永錫字孝傳號曉園錢塘人乾隆甲戌進士改庶吉

士授編修歷官內閣學士

游飛來寺

禪宮何事此飛來造物鍾靈亦壯哉
水勢總趨滄海下山門長對翠屏開
二禹孰辨游仙路初祖還留說法臺
不覺登臨動鄉思冷泉亭畔舊徘徊

戈源字仙舟獻縣人乾隆甲戌進士歷官太僕寺卿

詩話仙舟成進士年纔十七文譽亞其兄視學山西沁州處士葛培初年七十隱於詩仙舟物色之使應童子試取冠一軍

和李青墅贈葛培初韻

憶曾叱馭訪衡門茗椀香煙笑語溫
士氣故從吾輩作詩名原竝使臣尊
相知敢詡傳心法晚遇翻愁惹淚痕
好記青霄蜚羽日望雲有客詠騰鸞

曹學閔字孝如號慕堂汾陽人乾隆甲戌進士改庶吉

士授檢討歷官宗人府府丞有紫雲山房詩鈔

詩話孝如學行誠篤人樂與交詩亦平實頗肖其人
翁覃溪稱其詩在香山放翁間且言自古詩人在中
條王官谷者若義山表聖裕之及近日蓮洋皆以才
力跨越前後而先生獨以性情沖淡與道大適脫然
於名譽之外
斯言得之矣

贈介對江吏部致仕歸解州

無田不可歸有田不肯歸坐令二疏後丹青無光輝先生
在郎署恬澹世所稀與我廿載交爾汝心相知前年向我
道欲賦歸來辭君今以禮去觸我平生思此心如江水此
意猶依遠有田與無田義不盡於斯乃知各有志昔人未
易誠我有無限情此情當告誰羨君條山下松菊正芳菲
春暮同錢待之孝廉王敦初上舍法源寺看牡丹次

二君卽事有作用昌黎山石韻

海棠開過花事微春光婪尾如電飛天公意恐春寂寞故遣洛陽花態肥昨日猶看苞未坼入門差覺游人稀老僧走告忽驚喜今朝吐色堪療飢咄咄真有逼人意霞光錦爛排窗扉便有無窮蜂與蝶齊聲喧出香霏霏深色一叢栽得地屬僧裁幔張重圍臭蘭連壁借勝友午風暄輭吹春衣慈恩深紅雖可愛大畚舁之太不轍惟當日日過竹院春光莫放恩恩歸

雨中看山

下直常扃關軒窗四繞山時時看青翠長此對屏顏山色朝朝見未覩眞山面一朝風雨來氣象千萬變變態竟若何縷縷起微波須臾潮汐湧又或露青螺露處忽已沒有

無皆恍惚迷離山疊山雲與山俱活卻就連天浪摹擬山
形狀清風颯爾吹依舊山容放瞥見歎觀止徐徐思至理
君子蘊經綸不測總如此當其無事日豈有異人術遇合
會風雲虎變應髣髴

和陳繩皋前輩憶塞垣元韻

勝游轉瞬往仍還三月秋光一霎間最不忘惟松下月極
榮情是雨中山塞垣聚首驚陳迹京國比鄰憶舊顏自覺
壯心猶未已那堪相對鬢毛斑

歸來高卧北窗前懶慢心如不繫船驥足幾人看滾滾羸
車我亦自年年敢言白傅惟攤卷非學坡公待有田時與
素心頻聚首清歌濁酒樂陶然

不寒不暝好秋光重理齋頭舊錦囊園徑未荒籬下菊伊

人宛在水中央好攜樽酒邀明月擬杖青筇踏曉霜應憶
灤陽風景好隄邊遙認柳絲長

查善長字樹初號鐵雲天津籍宛平人乾隆甲戌進士

歷官工科給事中有鐵雲詩藁

詩話鐵雲爲蓮坡老人長子其官給諫
被命巡漕馳馬經行鄉里傳爲盛事

雨晴登環水樓卽景

夜雨酣如夢惜惜到五更曉來登水閣涼意滿秋城茶葉
同人瘦葦花生遠情癡雲飛不動角角學山行

青縣道上

閱盡高低路霜痕復草痕寒煙平似水叢樹遠疑村野店
無多席荒庵總閉門殘陽衰柳外指點戍樓存

于宗瑛字英玉號紫亭漢軍旗人乾隆甲戌進士改庶

吉士授檢討歷官御史有來鶴堂詩鈔

己丑九月與金香泖山中話別有贈

秋姿澹平野暮氣起蒼山林表月既白山中客欲還高情
慰愁夕寒露下松關揮手復塵跡心長雲水間

胡紹鼎字兩方號牧亭孝感人乾隆甲戌進士歷官御

史有所存集

詩話牧亭性至孝舉乾隆辛酉鄉試次春公車北上
母倚闥送之色慘然牧亭覺僞作腹疾返遂輟計借
侍母十二年不赴試母病嘗糞以驗甘苦與同年朱
竹君紀文達曹慕堂錢辛楣汪魚亭蔣心餘最善文
達稱其人品孤高學問文章具有根柢通籍後復肆
力於詩者十年律法最爲細密才力又足以充之故
蘄然橫絕時輩自刪其橐所存不過十之二三嘗自
序云人心厚則言不佻人心畏敬則言不肆能養其
性情之正則言日和平而進於道非貌託古人以取
譽於世夫亦求其所以自得而已朱竹君誌其墓謂
其卒之前一歲盡裂詩焚之將卒手百篇授曹夢齡
曹爲鏤木以傳詩簡古淡泊適如其人其師夏力怒

謂牧亭一字一句鑠肝腎而出之而又必乘之以自然之勢蓋浸淫乎漢魏而一變至道者也

辛巳夏登翼際山

過橋攀絕巘冉冉到虛空
石仄下臨水雲高微有風
萬家分漢北一郡出江東
此地何年別人煙遂不同

送夏需堂還太倉

明日江東路怱怱又遠行家鄉
同一望客舍已三更木落山風急
潮來海月生報書多盛事可以慰離情

和紀曉嵐贈張白菴韻

客游耽海嶽嘉會此相尋
花下三春醉人閒萬古吟
風塵隨捷足山水寄同心
莽莽飛光闊天涯共照臨

萬里艱虞後凌風立古臺
空山留片石老樹上新苔
百卷閒中得孤雲何處來
夜闌詩句好吟罷獨徘徊

西風吹薄暮，幕幕盡飄揚。揮土甯爲嶽，隨帆又轉湘。場駒還信宿，海鶴自翱翔。話別歸何處，東游向洛陽。

顧鎮字備九，號虞東常熟人。乾隆甲戌進士官宗人府主事。

登盤山

嵯峨千仞薊門山，謝屐當年迴未攀。百道泉光翻海窟，三盤地勢接天關。尋雲何處高人隱，扶杖曾看御輦還。指點衛公臨眺處，劍臺零落蘚花斑。

葉佩蓀字丹穎，號聞訑，又號辛麓。歸安人。乾隆甲戌進士。歷官湖南布政使，有慎餘齋詩鈔。

城子山懷古

賦詩臺畔瞰江東，橫槩依然意氣雄。只是臨流歎天塹也。

愁赤壁遇東風

鐵鎖何曾斷上流
臨江卻使五官愁
阿童他日風偏利
容易樓船下石頭

有以西域骨種羊裘見貽者謝卻之因綴長句

天公幻化紛奇譎
攫弄人心成蠱惑
冰蠶作繭火鼠衣
鷄尾雉頭恣絢飾
傳聞萬里流沙西
瀚海外環哈薩克
蒲山殺毬異丁零
達生自地非坻副
羊死以骨種之土
考牧依然勤力穡
細思西域兌所位
羊爲兌象全陰德
至陰不生乃無死
感以陽精復滋息
斷虺可聯鼈可藝
理有固然非臆測
茲羊留骨兼重皮
其中純黑尤難得
貴人爭購踰狼荒
一裘價可半千直
有客持寄致珍重
開緘觀者俱動色
旋珠細疊螺髻圓
黝光潤奪鴉雛墨
我生長物本何有
蔽

體聊取充要，懌忽看奇服。映懸鶉翻似，杜陵驚翠織。人生百事鬪，新異稱此以求焉。紀極美好，雖得時俗誇暴殄，恐有神明亟亟揮還客心。始恬朗詠素絲安退食。

望岱

震出東維峙，大鈞體元凝。秀鬱嶙峋雲煙一氣迷，齊魯松石千年厥。漢秦碧落上參無盡際，滄瀛俯掬有邊垠。遙瞻九陛明堂位，配極升中秩百神。

巖壑生平寢處逢，乾坤奇偉總羅胸。纔辭仙掌雲臺址，來眺天門日觀峯。曉霽吳閭明白馬，春陰碣石起蒼龍。神州此脈開洙泗，不信他山別有宗。

沈業富字方穀，號旣堂，高郵人。乾隆甲戌進士，歷官河東鹽運使，有味鐙書屋詩集。

渡河

霜鬢添來此日多，漫將心事託煙蘿。
疏星曙色分嶠嶺，落日西風湧大河。
春到傳巖應作雨，津開茅澗自橫波。
吳歛忽起鄉關思，彷彿離筵一曲歌。

有感

荒深庭院蘚苔斑，到處標題感舊顏。
落葉半填穿砌井，夕陽斜倚對樓山。
敦槃當日爭雄長，樵牧於今話等閒。
太息梁間飛燕子，年年春盡尙知還。

李夔班字栗齋號足一新會人乾隆甲戌進士官信陽知州有課廬堂詩鈔

送施嶧昭歸山陰省覲

主賓淮右三年餘，相送江南問起居。
好共來調趙抃鶴，休

思去釣子陵魚一帆風雪歸程遠千里關河悵望虛計日
春深應把晤願從禹穴乞藏書

黃惠字心庵永陽人乾隆甲戌進士官高安知縣有餘
事齋詩藁

度仙霞嶺步周櫟園壁間原韻

朱霞天半接高峯怪石森羅擁翠蓉竹外茶鐺敲雪煮溪
邊水碓帶煙春危巘盡入雲林畫絕磴來尋康樂蹤四度
出關緣底事幾人辛苦一僧慵

行李蕭蕭雪戒途千尋巖壁一筇扶泉流涓滴終歸海山
勢盤紆直到吳衣上嵐光行處散蘚深碑字望來無使君
自有宣城句

謂吳林塘明府

我亦喁于興不孤

紆迴石級接天長北苑屏風面面張十里轂音隨地轉

嶺爲

閩浙分界

方語各別一肩湖草過山香

江南丹陽水草過嶺乃香

卉衣推髻盤荒

徑紅橋青瓜貢尙方半刻閒身同小隱竹竿籬籬立滄浪
呼吸真堪帝座通上方初日照瞳矐飯僧燒筍空林下供
佛移花古剎中老圃灌園擎甕重旱田編竹引泉工半生
辜負看山約又向春風逐塞鴻

陳伯丹李荷卿李天卿秋夜集雨香齋小飲

秋風常不改悲懷直到今相看俱作客半醉便微吟疏柳
三更月冥鴻萬里心知君能遣此樽酒與鳴琴

周春字松靄號芑兮海甯人乾隆甲戌進士官岑谿知
縣有松靄詩鈔

荏平懷古

凌煙閣上盡公侯奇遇誰能似馬周英主用才元不測太

平作相更何求生前忠孝光青簡死後形容動紫旒羊鼻
鳶肩曾共事昭陵斷碣卧深秋

張湘字楚山天津人乾隆甲戌進士官餘干知縣改新城
教諭有大雅堂詩集

題思源莊

重築金吾舊日莊紅菱白芡護山堂丁甯河上銜泥燕還
向烏衣覓畫梁

暮捲珠簾暑氣收臨河亭子坐來幽照人一片空明水風
滿垂楊月滿樓

陸燿字青來一字朗夫吳江人乾隆甲戌明通榜授內
閣中書官至湖南巡撫有切問齋集

詩話朗夫治宋五子之學精析義理洞達事物讀書
一歸於實用直樞廷資深出守游陟方面以廉潔自

矢所至有政聲初蒞長沙夢吟七言長篇記一聯云
能開衡嶽千層雲但飲湘江一杯水清介之概夢寐
不渝被其澤者
誦之爲流涕云

宿瑤亭子

吉行有程期駐驛日未午前至瑤亭子萬帳息貔虎離宮
宿衛嚴曠騎殼強弩羣馬喑不驕夜靜聽更鼓扈從多文
臣輕裝離隊伍一一覆穹廬文翰集圖譜高竿挂旗幟夜
則懸燈火公餘每過從望標輒知所自愧佔畢儒舉十昧
二五勉哉盡職業上以報明主

青山梁曉晴

隔宿戒徒御言度青山梁此地易陰雨往往沾衣裳宜令
先事備結束趁早涼僕夫應且笑向曉偏晴暘旭日照征
衣曠曠來扶桑翠華旣前擢萬騎隨騰騰驤聊復策余馬超

忽登高岡下視曬樹溝木葉秋清黃

大人命題臨本西嶽華山碑

漢隸十碑九敝剝尋行可讀存西嶽舊搨流傳直萬金雙

鉤摹勒違其朔茲本獨無秋毫爽誰歟妙手尚書學

商邱宋大

中我家借臨規九勢一波一磔鈔雕琢豈無畫沙與印泥

世人競尙谷口學鄭簾不知斑駁非本真當其脫手光濯

濯卽如晚出有曹全正於姿致見高卓不然徐

季海韓擇

木皆唐賢何不率臆逞肥濁蛇紆蚓縮遞相師唐人學漢

無人覺可惜神靈失呵護竟同薦福毀雷雹郭髯趙嶮今

俱死遺文金石誰商推

送顧宗人古湫

虞東顧夫子著書仰屋梁日食太倉不滿腹歸心忽逐南

雲翔縱是無田計亦得槎枿萬卷撐空腸化爲文字異詭
怪吉雲甘露呈殊祥末流承學正歧驚卑者墜谷高排闥
四方上下奚所稅亟須導引歸中央要以六經爲根柢先
就制義除秕糠碑版論述貫子史六書聲韻兼稗倉等身
著作老無用歸與後學陳其方吾鄉輩出富才俊近來本
業多蕪荒爭事組織爲巧麗依附哲匠成聲光願返浮文
出經術茲行能不懷餘望嗚呼茲行能不懷餘望

曉發案斑鳩活絡色欽

晨炊早熟徹裘輕殘月猶懸事曉征雁背白雲沙際立人
穿紅葉嶺頭行無多長物酬僮僕只倚同官作弟兄聞說
關山今極北向南明日是歸程

甯楷字端文號櫟山江甯人乾隆甲戌明通榜官涇縣

教諭有修潔堂稟

詩話櫟山少貧甚賣卜以養親課蒙江村江甯令張嘉倫夜微行聞其讀書聲就語試以文驚爲異才招至鍾山書院肄業竟成名爲校官終以鯁直罷歸貧如故也有金陵懷古百韻詩喜馳騁時有健句可取

過九江

琵琶亭外好風催十幅蒲帆快溯洄春水倒流三峽去夕陽斜渡九江來小孤翠黛波心出彭澤煙光鏡裏開眼底不知今古異灌嬰陶侃自多才

黃陵廟

目斷重華竟不回鷓鴣聲入遠江哀暮雲祇傍蒼梧宿春水還疑滄汭來淚竹豈愁秦帝火巫歌曾借楚卿才更堪鼓罷淒清瑟風雨蕭蕭兩岸苔

梁肯堂字構亭號春淙錢塘人乾隆丙子舉人由知縣

官至刑部尙書出爲漕運總督有石幢居士吟藁

詩話春洪初幸灤城有政聲累遷至直隸總督入長秋官出監漕政裕陵復土故事以高年大臣三四

年歸里至家甫數日遽卒年八十有五

秦淮泛舟

管細絃么簇畫船河亭風幔鬪芳鮮消魂一曲秦淮水纔

見垂楊便可憐

癸酉小除夕

踪跡眞如不繫舟堂堂光景速於郵應酬門戶憐黃口料理
藿鹽累白頭送臘縱銷千日酒挑燈那遣萬重愁祇餘

舊雨耽文雅分榻論詩爲我留

時延吳大翰田度歲

劉秉恬字德引洪洞人乾隆丙子舉人官至兵部侍郎

有公餘集

明月店

玉鏡當空照流輝萬里清最關游子意偏動遠人情夜伴
琴書息朝辭劍佩行郵亭多少處明月舊題名

畢廷斌字憲章號恥齋昆明人乾隆丙子舉人歷官定
南同知署南安知府

舟夜行過太和黎明抵廬陵

日落晚風輕濛濛水氣橫天河垂夜永漁火傍星明照渚
溫嶠癖聞歌謝尙情今宵乘貫月縹緲十洲行

卽事

山城木葉落蕭蕭手蒸松明夜漏迢迢月色空庭看不盡
一瓢清酒讀離騷

蔣業晉字紹初號立厓長洲人乾隆丙子舉人歷官黃

州同知有立厓詩鈔

詩話立厓詩頗效隨園甌北之體故兩家皆稱之於
馳騁中不涉輕佻差爲可取在官時因文字之獄牽
連遣戍久之始歸吳中推爲耆舊與潘榕
臬韓旭亭諸人唱和晚作漸趨平易矣

過太華山下

太華接天險突兀起我面驅馬山下行朝看暮猶見崔嵬
少昊宮隱現列仙館戟冠壓雍梁芙蓉插霄漢巨靈訝初
劈兩戒忽中斷西方物所成呼吸能吹萬紫氣騰寒空白
雪凝匹練何處酌天漿仰止徒生羨替我登岱宗裏糧勞
不憚揮手凌雲端聳身倚天半崎嶇十八盤籃輿尙安便
詎似陟此峯鐵索懸一綫韓公好事徒痛哭殊膽顛遠游
我已非登高豈所願白雲裊晴巒回望生依戀

六盤山

橫塞接青冥天教作障屏陰崖闕冰雪絕壑走風霆秦棧
雄今古行人恐晦暝驅車最高頂長嘯起山靈

龔開畫瘦馬行次沈歸愚宗伯奉敕作原韻

古人命意多神奇千金駿骨市不疑杜陵野老慨瘦馬鬱
勃寄興東郊詩翠巖昔日稱畫隱生逢末造悲其時蹴踏
四海滿荆棘踟躕轅下傷塵羈神駿豈存食肉相蘭筋豪
骭標龍姿銅駝石馬當日盡禾黍百世以下畫本珍重乃
受天家知不鳴不躍自矜寵帝庸作歌誰賡詞惟公胸次
同杜老凌紙怪發杼襟期而胡江村老詹事無能爲役祇
錄東郊瘦馬詩吾聞米芾奉敕作大字潑墨染袖何淋漓
孰若公詩挾天藻一吐終古寒士碑矧胸中奇卽今林下
許問字導夫先路猶孜孜晉也後生厠末座杖履無恙欣

追隨蹭蹬久同槽
樞困感激還勵風雲思
安得長邀伯樂
顧養成毛骨供驅馳

北庭都護行爲武勇公奎將軍林作

南山有竹直不扶
括羽鏃礪懷以須渥洼之馬龍爲徒星
精下降天閑儲人物絕類稟自殊濟時英傑生非虛惟公
大將行則儒忠信甲冑體用如火不能熬水不濡出險入
險同坦途往者滇海申天誅急槍怒馬千人呼譬若獨鸚
摧羣鳥詩歌召虎平淮徐一人知已無雙譽遠移節鉞天
山隅輪臺四野黃雲徂長風捲沙雪片粗蕃羌射生飲酪
酥每借游牧窺邊虞秋獮冬狩軍政符六鈞弓注金僕姑
壯士一一勇賈餘圍場霹靂聲連珠飛者走者殲且屠羣
獠驚竄如鼷鼷烽臺絕磔鼓不桴經營荒漠垂久圖耕屯

悉力勞征輸南接高昌北伊吾糗糧車乘隨時需遠近徵
調難牽拘斟酌多寡善因除公之叱咤風雲驅直入虎穴
無趙趙公之平易陽和舒水清或恐無大魚一規定遠籌
邊謨期年化洽軍民蘇玉門關外春來初織織柳色雲中
鋪龍城清霽侔皇都我來遠戍同集枯瞻望弗及空歛歔
長城之倚廣厦居先聲已浹人肌膚結綠青萍抱區區有
懷欲吐難陳書星雲垂象昭天衢回鶻利見占豈誣文武
爲憲詞非諛北庭都護如公無吁嗟乎北庭都護如公無
從將軍圍獵南山口歸紀其事

北庭之北南山長山圍左右皆降羌其俗慄悍錯雜處非
示殺伐多披猖聖朝拓地二萬里酋長率服俱來王控弦
士馬半耕鑿戍已校尉停邊防寓兵於畋作軍政春蒐秋

彌威遐荒將軍昨歲除天狼簡命秉鉞來堂堂充國之謀
定遠略揆文奮武昭龍驤輪臺九月氣肅殺乘時出獵山
之岡八旗軍士共結束幟分赤白青元黃步伐止齊聽使
令或應翼布或箕張雕弓入手鳴霹靂驕馬脫轡馳風檣
元戎腰橫大羽箭挽強作氣吞黃獐耳後生風鼻出火穿
林跳澗捕逃亡翩翩公子錦衣郎人馬俊逸不可當番回
健兒鐵袖襠呼鷹放犬爭趨蹌射麋麗龜取狐貉恍同效
順提壺漿合圍陰山山欲動遠近震懾軍威揚隊中不整
卽鞭責幾經申令逾三章國家習武本教戰爾輩何得干
戎行鯁生此日欣寓目驂乘還許同翱翔登俎登器有典
制選時選地宜周詳長楊賦獵夙昔志空山駐馬殊徬徨
將軍罷圍歸虎帳雄心對酒慨以慷爲言此地禮廢久須

明正雜言圖卷之十四
三十一
教有勇還知方風霜敢惜邊境苦兵甲自耀天庭光夜深
寒氣入帷幄起視山月煙蒼蒼

鞠愼字彝恭山東海陽人乾隆丙子舉人官安慶同知
贈高上林先生

海邊辜負舊林邱南北經年伴遠游買酒鵲湖同倚棹聽
歌燕市共登樓上書又下劉蕢淚長笛偏生趙嘏愁可惜
年年芳草綠春明還與約淹留

盛百二字秦川秀水人乾隆丙子舉人官淄川知縣有
皆山樓吟藁

題畫鰕魚

何處春晴繫客思吳孃織手膾銀絲憶從西塞山前過正
是斜風細雨時

魯城二石人歌

魯城東南六七里有石人二一鑄樂安太守廬一鑄府門孔君荏谷掘以

寄贈賦
詩答之

辭漢金人淚暗滴何處摸抄歎銅狄歸然不見魯靈光一
例西風吹瓦礫石人乃得全天年偶立千秋古道邊樂安
太守爾誰是姓氏猶在名無傳古道離離徧禾黍但向斜
陽日延佇干呼萬喚不肯回忍覩蓬萊變塵土日暄雨洗
換年光碧蘚紅蘿作繡裳紙錢飛散白蝴蝶寒食何人澆
酒漿斲冰詞客好事者獨往驅車弔原野古隸龍文揚寄
來翠墨寒濤我心寫宇文石鼓等兒孫苦縣光和是弟昆
遙知月冷清霜夜石人相對語精魂

蕭霖字雨垓號曙堂江都人乾隆丙子舉人官晉洱知

縣有爨餘昆海等集

闢署後空地爲菜畦

公儀昔相魯園中拔其葵豈以士大夫而學園夫爲此語
所見大吾敢忘情規第念勤與儉亦足箴官師杭田五十
畝傲吏恆有之食菹廿七品廉士甯非宜區區意如此疑
爲有識嗤寄語賢守令吾志甘自卑

家無五畝園迂拙愧老圃四體不知勤年年飽天庾伏念
閭閻中歲時多作苦抱甕縷龜手插棘刺傷股烈日蒸笠
蓑嚴霜溼衣履我來課園丁此景眞目覩一勺杯中羹民
間汗如雨念此心灑然聊訂嘉蔬譜

治人自有術種蔬亦有方培之欲其厚養之欲其長毋爲
日炙乾勿令蟲螯傷雨露所不逮灌溉焉可忘行之經半
載已見沃若光瓜壺碩且大葵藿清而香如有非種者鋤

莠安其良物生既以遂庶可佐盤觴

吾愛於陵子習靜逃世喧吾愛漢陰叟忘機樂邱樊一行
已作吏茲事甯復論退食幸多暇荒畦且爲園雜草平蕪
徑編竹開籬門春風坼嫩甲秋雨滋陳根非敢誇吏隱聊
以息塵煩咄哉漆園吏位卑道彌尊

李天英字藥庵永川人乾隆丙子舉人官貴筑知縣有
居易堂集

洞庭

一聲衡雁過鳴鶻洞庭游帆飽輕風送湖寬細浪收欲騎
仙子鶴何處岳陽樓不敢吹橫笛湘山正暮秋

阻風燕子磯游永濟寺口號

莫向江神問險夷一江風浪過來知人間儘有平安路口

在收帆轉柁時

孤亭如翼浪如雷劃斷東流向北迴欲問南朝舊時事寒
鴉唳過雨花臺

覺羅成桂字雪田乾隆丙子舉人有讀易山房詩

詩話雪田能詩早世嘗手錄所作詩贈宗室橋
仙將軍法梧門爲題記深致長吉奚囊之惜

題傅凱亭畫山水

半世櫻塵網襟懷總不羈但看高士傳每與鹿門期妙手
寫生處幽人坐息時上衣山翠好林壑結相思

野興

川原望曷極薄暮不知還或有鳴琴者深林早閉關我來
流水外秋在夕陽間此意誰同喻歸雲態自閒

周得壽字百齡號菊畦通海人乾隆丙子舉人

自玉石莊達天成寺

樹影沈沈合山光簇簇濃蒼煙來絕壑落日在高峯晚飯抄雲子香泉芼鹿茸耽吟殊不寂卧聽上方鐘

何在田字鶴年廣昌人乾隆丙子舉人有玉耕堂詩集

詩話鶴年人品甚高廉徵逐寄居南昌僧舍蔣心餘見其詩壁間與訂交始知名於時其詩骨重意深迥密而翔耀在同時西江詩人中特爲矯矯

送崔尙之歸蜀

崔君趺坐厭局促多在楚鄉少在蜀坦然嘯歌真率人不似吳兒腸九曲西施嫫母各天然弄粉調朱乃粗俗君才本非幕下士肯教明珠彈飛肉脫粟布被我有之何用故人富貴爲執炙焉能知炙味丈夫立志羞朵頤白衣步擔不足惜客興無使秋燕悲篋中雖貧亦何壯猶有五萬新

蒲葵此去湖湘煙雨隔千山萬水想行迹樹因無主號相思鳥不多情亦頭白心中萬事常棘口握手恩恩憶不得但屬他時幸相見不改今朝舊顏色

放懷

三年羈病絕冠纓此日家山眼力明歷徧世緣粗識道恥從詩句得知名溪留鷓鴣能消毒庭植冬青卻愛晴石鼎竹鑪無一事雕胡如掌露華盈

野望

屐危仍舊蠟衣浣試新痕小雨來何處歸雲各有村町畦聊自洽杞菊與誰論燒塵何妨事真知舌欲捫

觸目

隱隱杉皮屋離離芋葉田歸人如斷雁遠水勝浮煙市晚

低魚價村荒減社錢投壺有新格爲致酒如泉

自崑山歸抵江陰

又見歸帆處延陵舊邑城
早霞隨日上敗葉擁潮行
颺激翔雲吹鷗翻颭翠旌
客懷添幕府新覺搗衣聲

春日江上小園卽事

春泥小徑溼柔荑
蘚綠空園響竹雞
斜日遠山凹凸見
晚烟叢樹短長齊
門庭整頓煩良僕
井臼荒涼感故妻
眼底十年無限事
江流亦改舊時隄

津門晚眺

津門斜日下東流
無數艤幢伴海鷗
陰火欲燃天轉晦
晚潮纔過暑成秋
託名久擬逢羊陟
作客誰當識馬周
自許壯游差不負
蓬萊雲氣滿之罍

晚晴移詩匯卷八十四終

晚晴簃詩匯卷八十五目錄

明瑞 二首

奎林 三首

李世傑 四首

託庸 二首

莽鵠立 二首

李宏 一首

鄂忻 二首

陳樹著 二首

李秉禮 十六首

汪棣 一首

汪啟淑 二首

金德輿 一首

卓奇圖 三首

傅澤洪 一首

張法 四首

胡期頤 一首

張符升 二首

潘尙仁 六首

鄭王臣 三首

張邦柱 三首

邱中玉 一首

白衣保 四首

汪松 三首

高珩 三首

陸鍾輝 一首

佟鉞 一首

陳長鈞 一首

程夢湘 四首

王道 一首

吳貽誠 三首

周彥曾 二首

孫起柎 三首

彭雲鴻 七首

汪軻 七首

胡鈇 五首

張如焯 一首

張開東 二首

金忠淳 一首

曹煥 一首

晚晴移詩匯卷八十五

徐世昌

明瑞字筠亭滿洲旗人官至雲貴總督封一等誠嘉毅

勇公諡果烈有北窗吟藁

詩話果烈征緬甸孤軍深入陷敵力戰卒以身殉風
工吟詠嘗有送弟使烏斯藏句云寒分百戰袍渴共
一刀血忠義奮發意存辭表

九日

何處登高郭隗臺望中樓閣更崔嵬晴郊霜隼迎風疾渤海長鯨撥浪迴騷客興隨秋水遠故人書報菊花開莫評燕趙千年事陵谷纍纍實可哀

澄江

對面金焦好放眸春江重渡蹇誰留一天風色歸颿飽萬

頃煙波畫槩柔龍虎氣衰堪飲馬鯨鯢浪息敢吞舟太平
功業超千古天險何嘗是帝州

奎林字瑤圃滿洲旗人官至成都將軍封一等武勇公

兼一等男諡武毅有幽棲堂吟藁

詩話武毅勇冠三軍而說禮敦詩雍容儒雅素嗜梅
村詩背誦如流水故其所作詩辭藻宏富音節高亮
猶有婁東餘響如詠古云秦庭一哭終存楚越國三
軍竟沼吳惜別云對面易成三里霧離心先託四紵
秋皆其佳句爲吳南野所稱

晚眺

絕塞居閒暫息機晚雲看盡攬征衣夕陽下地羣鴉集風
色橫天一隼歸壯歲自傷塵鬢改故人漸覺尺書稀酒酣
獨立蒼茫裏何處高鴻避繳飛

聞蛩

殊方冷暝候難同入夜蟲吟初夏中孤客莫悲秋意早玉
關原自阻春風

自伊犁馳赴金川軍營遙別素村

萬里遙相別天涯更遠行百年殊夢幻一劍是平生熟慣
從軍樂渾忘兒女情無勞念游子身世久風旌

李世傑字漢三一字雲巖黔西人官至兵部尙書加太
子太保諡恭勤有家山紀事詩南征草

詩話恭勤自少以父官兩淮鹽大使遂入資爲巡檢
歷任州郡以廉能盡職爲陳文恭阿文成所識拔游
膺疆寄內擢兵部尙書高宗屢欲以爲大學士尼
之者言其不由科目例不可官內閣遂中止洪北江
視學貴州嘗道黔西公先以病告歸足疾不得行兩
僕扶掖出迓於道左北江亟下輿揖曰何敢勞公公
笑曰非迎學使乃迎
不徇情面之賢者耳

過飛龍關

羃屨春陰釀曉寒
雨餘嵐翠撲征鞍
盤旋馬踏層雲上
淡沱峯如入畫看
村舍炊煙浮碧穗
溪橋亂石激清湍
登臨已覺行非易
負重邊氓食力難

清溪縣

踏破層雲下碧霄
沈黎煙景晚蕭蕭
山分爽道蠻天迥
路向烏斯異國遙
荒邑衙齋供館舍
民居板屋耐飄搖
無眠一夜風聲急
似聽錢塘八月潮

伏龍寺

狹棧緣溪曲折升
鐘聲遙度白雲層
懸崖凍瀑噴如雨
雪磴陰風勁有棱
廚下細泉隨竹遠
巖前片月共窗憑
莫愁天險難飛越
有路應堪拾級登

六月過山根站遇雨

雪磴陰風砭骨寒千尋積素聳雲端寫生擬倩傳神手畫
向炎方六月看

託庸字師健號瞻園滿洲旗人官至吏部尙書諡誠懇

有瞻園詩鈔

瞻園月下作

不堪一片月仍傍晚花明當此初秋夜偏多弔古情鍾山
餘夜燒鐵甕走江聲捫首見霜雪皇然老大驚

憶山莊舊居

一徑深林古岸斜疏籬曲院足煙霞竹根籜解黃岡筍雲
液香烹顧渚茶繞砌清泉流石髓隔簾寒月照梅花何時
了卻風塵事短杖歸閒野老家

莽鵠立字樹本號卓然滿洲旗人官至都統諡勤敏

大清閘詩爲王司馬賦

白塔山前水向東唐渠疏浚總無功王公學得蘇公法一
道長隄築浪中

巧奪天工一覓橫高低喜聽叱牛聲亭臺閘壩同唐漢不
愧標題號大清

李宏字濟夫號湛亭漢軍旗人官至河東河道總督有
戢思堂詩集

題素園圖送王二鏡巖歸里

君自會稽來挹此東南美磊節竹之操虛中竹之理君本
素心人合與此君倚今復灑然歸峭帆問煙水如遇會稽
竹道我念無已

鄂忻字怡雲滿洲旗人官至工部侍郎有清虛齋集

詩話怡雲爲文端第五子嘗出駐和闐賦和
闐四景詩從容閒雅不爲邊塞行役之辭

登祕魔崖

山深寂人語但聞野鵲喧鳥道橫虛空孤雲若可捫斷崖
石室祕靈怪潭中水落蒼龍奔長風浩浩吹我身飄然直
上臨天門下視城郭漲紅塵大呼仙人鬼谷子相與結伴
登崑崙

和闐吟

卻喜桑麻地經年無客過大都春雨少惟有夏雲多秋日
光偏潔春夏常多風霧至秋後始晴明冬時氣亦和冬日和曠過於內地葫蘆爭取
水來往汲清波此地無井回人咸荷葫蘆取水於池

陳樹蒼字學田湘潭人蔭生歷官鴻臚寺卿

詩話學田恪勤子初以在子官西曹數歷中外其後
刑部火文籍皆燼命嘗官西曹者追錄以進學田所

述最多人
稱其彊記

燕中秋感

幽州秋意早客望獨登臺斜日連雲去涼風逐雁來當歸
非鄭重久立亦遲迴已自逢蕭瑟碓聲莫漫催

金華題砌下小松

何年離澗底傍砌亦成陰未有棟梁具空含霜雪心牆花
低欲壓簷溜暗相侵不作虬龍隱華嵩山自深

李秉禮字敬之號松圃臨川人官刑部郎中有韋廬詩

內集外集

詩話松圃辨香左司同時如秦小峴李子喬皆學韋
然顏旁涉諸家惟松圃墨守蘇州終老不易故變化
不如秦李而精微過之其善者幾如空中之音相中
之色人皆聞見難可捉摸通體洗練都無李草推七
言稍弱生平與子喬最契內集皆經點定子喬歿凡
未經點定者則編入外集子喬亦極推服至欲躋於

朱王之上則
未免過情耳

湘江曉發

軋軋鳴柔艣行行感暮秋
曉雞催短夢殘月在孤舟
炎嶽雲中出碧湘天外流
一聲南去雁惆悵故園愁

夜雨

涼風吹落葉秋氣正蕭森
一夜孤篷雨懷人湘水深
遙天征雁斷野寺曉鐘沈
料得重雲外蒼蒼入桂林

早發襄陽

雲樹渺無際江流日夜長
猿聲初到枕客夢未離鄉
古戍吹殘角孤城接大荒
鹿門何處是回首但茫茫

夏夜池上納涼

披襟坐池上日夕澹忘歸
明月忽在水荷香生我衣
夜涼

羣動息風定遠鐘微因念塵中客翛然似此稀

送人還鄉

送客歸南浦關山滿別愁愁心似春水處處逐君舟

南樓

南樓雨初歇風溜響潺潺一水到門靜兩山終日閒雲連
村樹暝鳥帶夕陽還頓覺煩襟滌蕭然濠濮間

雪霽登樓

茲晨雪初霽虛室有餘閒登樓一以眺萬象皆澄鮮白日
照荒野豁然開遠山厯厯辨林麓稍稍鳴幽泉斟酌情彌
殷俯仰神屢遷驚鷺自北來孤鳥沒寒煙歸雲將暝色消
散惟空天長歌佇明月人境兩蕭然

同子喬樓霞寺待月作

鐘魚寂無響涼秋在高樹濛濛煙未收稍稍月初吐林巒
互明晦階除已流素旣愜平生歡復茲清景遇幽賞殊未
已芒履霑微露誰爲後來者還當識此趣

玩珠洞燕集送別子喬之鎮安

下瞰無底潭上壓千尋壁石柱忽倒垂一洞破青碧山空
人語響徑古苔痕積旣瞻米老像還求范公蹟曠懷耿至
今風流緬似昔濁醪共斟酌雜坐雲根石迴瞻隔浦帆隱
隱沒沙積水風時吹衣斜陽澹將夕偶步已浩浩欲去仍
惻惻良會不可常況值遠行客

曉行

雞鳴呼僕起征鐸驛門前宿露方霑草數星猶在天漸分
山下路時聽寺旁泉卻羨經過處村村掩戶眠

過吳木虛寓齋

憐君棲息處地僻少人尋
野水帶茅屋遠風生竹林
鳥聲臨磻響花氣隔簾深
好是關情甚無時卻廢吟

游鐵佛寺華景洞

雨霽山色佳延眺孤興發
招提倚雲根境寂悟禪悅
不逢巖居僧惟見鐵鑄佛
空翠撲衣衿靈異祕石窟
乳竇極深黝仄徑盤曲折
苔滑不留趾蹙蹙屢防蹶
一綫漏天光峭壁忽中裂
竦身出峯脊下視何斗絕
恍疑魂夢醒頓覺心目豁
摩挲蒼石棱中有唐宋碣
曾經幾劫火古字半磨滅
暝色蒼然來去鳥望中沒
竚立更夷猶長歌懷往哲

季壽无咎復園連日游桂林諸勝復園作圖季壽无咎各繫以詩裝成卷軸示余爲作是詩

白龍洞

洞中石壁上有唐李渤留別南溪詩云常歎春泉去不回我今此去更難來欲知別後留

情處手種巖花次第開詩極懷惋覽之慨然有作

白龍已飛去千載洞長陰題壁人何在巖花開至今我來訪前跡祇覺氣蕭森泉響不知處泠泠清到心

月夜池上

商飆入梧桐涼月侵虛幌西齋掩書坐落葉時一響攬衣出前楹信步成獨往圓水涵空淨孤煙逗叢莽梵鐘何處來悠然淡塵想

汪棣字韓懷號對琴歛縣人官刑部員外郎有持雅堂集

寄春稿

風露迎階欲二更翦燈獨客總關情西山爽氣曾經眼東

國儒生偶識名中夜忽思箋蠹賦隔鄰偏覺僻驢鳴棗林
桑泊多秋色翰與歸程緩轡行

汪啟淑字詒菴號秀峯歙縣人官兵部主事有漆園吟

甌江游草

詩話詒菴家有縣潭山館極池臺水竹之勝博收載
籍乾隆間開四庫館以所藏善本獻與武林振綺堂
汪氏相埒賜書通德
並爲東南文獻世家

桐江曉發

篙師蓐食興振舵天猶昧橫空白雨來瀟瀟響篷背遙指
桐君廬雲深迷所在石尤挾銀濤怒激孤舟退起看山作
圍坐愛鷗成隊江柳裊繁絲岸草拖輕黛眠餐困客途林
泉發勝概朗誦謝客詩清游儻能逮

南亭

雨餘景物幽俯仰得清曠南亭一登臨頓覺吟懷暢澄江
作帶環翠岫開屏障于時屆朱明平疇翻碧浪候鳥有佳
音流雲幻奇狀好風遞漁歌落日聞樵唱平生厭浮華山
林秉微尙何當釋塵累高步追禽向

金德輿字雲莊號鄂巖桐鄉人官刑部主事有桐華館
吟藁

響鈴墳

南渡諸陵草木空一抔猶得瘞蒿蓬荒邱白骨魂休怨去
國青衣恨未窮淚盡銅僊非漢闕歌殘玉樹憶陳宮夜烏
嘯歇秋蟲死剩有鈴聲咽曉風

卓奇圖字聖肇號誤菴滿洲旗人諸生官戶部筆帖式

詩話乾隆初誤菴與峻德慎齋保祿兩村胡星阿紫
鋒同官戶曹掾相唱和嘗輯白山詩存未及成書遽

以疾卒誤菴詩整嚴精到嘗爲友題扇云野水平沙
落日遙半山紅樹影蕭條酒樓人倚孤尊坐看我騎
驢過板橋紀曉嵐稱其遙
情高韻條然有塵外之致

大通橋卽景

夾岸垂楊帶雨青踏歌人訪濯纓亭幾行睡鳴隨波注流
到橋邊夢未醒

八里橋贈別

旗亭重敘別情逼古河梁遠水連秋色孤帆背夕陽含悽
辭故侶帶醉入他鄉不盡浮雲意先教寄短章

客過

客過山窗索煮茶焚香坐石話桑麻閒雲飛出嵐光瘦倦
鶴歸來樹影斜老我半生因楮葉留君十日對桃花量晴
較雨饒佳興何事勞勞問酒家

傅澤洪字育菴滿州旗人歷官江南淮揚道副使

詩話育菴撰行水金鑑綜括古今臚陳利病書切於實用足與桑柘並傳

水西煙雨亭

雨霽日復佳乘興出東郭漫檣桃源舟曲折上高閣豁然
俯蒼茫一葉任飄泊山城煙靄中遠峯翠欲落驚鼠竄古
松清言向修籀緬彼詩中仙九原其可作返照挂丹楓秋
風入寥廓遠公期再來不信心已諾

張滋字西潭漢軍旗人監生歷官湖南驛傳鹽法道有

買桐軒集

唐頽山雨後晚眺

倚眺唐頽閣晴光四野生殘雲留樹溼斜日射山明江色
連天色歌聲雜鶻聲徘徊魚磬裏新月向人清

山居贈張石帆處士

數椽空谷裏地迴絕塵氛採藥迷歸路看山踏亂雲
杯傾松上露飯煮水中芹不識人間事悠游麋鹿羣

姑蘇懷古

金閭繫舫獨探奇虎阜登臨落照時天外有湖歸范蠡
山中無客拜要離杜鵑紅染貞孃墓楊柳愁深伍相祠
響屨廊中人化土尙留新月認蛾眉

泊表誠寺

一名蔦蘿寺俗傳明太祖戰陳友諒被
困絕糧老僧進食卽位後遂勅建焉

蔦蘿寺外草蕭蕭流水門前晝夜號苔蝕殘碑封瓦礫
煙埋古殿剩松濤一杯麥飯同光武三尺銅花類漢高
莫歎此間荆棘滿鐘山陵上亦蓬蒿

胡期頤字永叔武陵人官江西臨江知府有南湖居士

集

蔣叔程過訪余以病未面復見寄一律次韻答之

自信嵇康七不堪殘年決計返江南屋梁落月添離思天際飛鴻渺去函羨子才如千里馬笑予身似再眠蠶攜來佳句渾忘病更擬尋山看曉嵐

張符升字子吉蕭縣人歷官柳州知府有蘇門山人詩
秋日蒹葭莊漫賦

九月霜初飛清光下寒葉天迴獨俗氛秋山青見骨微風吹林端蒲葦聲獵獵迢迢遠水明隱隱虛舟涉自分塵緣疏渺與外人接

桐西

十年不記桐西路瘦馬閒吟入莽蒼幾葉破帆隨短岸數

株殘柳曳新霜田園蕪盡門猶設骨肉情多語易長塵空
勞人來又去竹窗尊酒兩茫茫

潘尙仁字似山號南林烏程人歷官錦州知府有蘇門

山客詩鈔

沈歸愚曰吳興潘南林先生少喜爲詩蒞官後亦不廢詩由吳陵判官至中州別駕司馬以及出守錦州所至如春風著物民受披拂欣欣有長養意因得於靜治之餘奇興吟詠

平山堂

棟梁虛敞麗高臺縱目秋光四望開平楚冷煙依檻過遠
山晴影入窗來風流閱世成千古景物興懷更一回佳句
自應推往昔含毫不覺愧非才

怡雲別業雜詠

榆柳團團接翠微野人心事莫相違白雲從此閒舒卷不

許漣漫出岫飛

茅屋蕭疎八九間雙扉終日向溪閒何須更上清暉閣自有高樓看好山

低築垣牆小界鄰野蜂閒蝶往來頻最憐山月當頭起比校城中早近人

密竹參差欲漲天秋來洗得最堪憐自家取足漁竿用更與溪翁備織筌

一派潺湲夢寐餘百門泉水護幽居耳中俗物應流盡管取襟懷並太虛

鄭王臣字慎人號蘭陔莆田人拔貢歷官蘭州知府有

蘭社詩彙

詩話蘭陔嘗選莆風清籟集自唐宋至國朝一千九百餘家次爲六十卷蒐羅勤至一州文獻足徵矣

秋雨

澤國多秋雨湖嵐結夕陰溼螢黏壞壁飢鳥落疎林浙瀝
蕉聲碎空濛樹影沈移書防屋漏蕭索動微吟

過江如村

南國佳人住水村春潮寒碧浸籬根蘼蕪猶作裙腰色一
道青青直到門

金棗銀鴛葬故鄉梅花猶繞墓門香馬嵬原上生秋草紅
粉成灰賸錦囊

張邦柱字蔚齋號芷鄉醴陵人貢生歷官思州知府有
嘯松樓詩集

謁柳公祠

竄迹湘濱十載逾天將華藻闢靈區從教後世更稱聖

榜稱柳聖不及先生舊號愚入記風流泉石潤四家文字鬼神

扶塵顏未敢修長跪古座衣冠冷笑吾

白日悲歌荔子丹愚溪橋下水漫漫柳公巖古長留姓司
馬塘今尙紀官遺廟兩州尸祝在穹碑一片墨痕殘清時
無復徵蛇乳閭左恬熙賦役寬

人曰

殘雪初消古市傍一鞭款款去來忙春交水上三分暝風
落梅邊幾瓣香顛倒酒人敲阜帽淺深油壁簇紅妝天公
解爲佳辰霽不放微雲碧宇藏

邱中玉字朗如一字璞齋黔陽人官至浙江平陽鎮總
兵

還家偶述

僕僕征途馬上身廿年鄉夢繫風塵歸來偶值登高節喜
極還爲太古民泉石留題多老輩園林歷劫憶先人兒童
父老團樂會話到更深不厭貧

白衣保字命之號鶴亭滿洲旗人官荊州參領

山僧吟贈青眉道人

夕陽落幽澗風泉鳴疏林泉聲瀉澗影不亂山僧心山僧
久面壁坐處寒雲深哀猿與孤鶴相伴山僧吟

春愁

不解因何事當春倍黯然野棠孤冢月芳草暮村煙許國
心猶壯懷人夢可憐無聊頻喚酒費盡買花錢

渡黃河

擊楫金隄下中流望眼開水從天上落人自日邊來廢壘

寒煙白荒墩畫角哀夷門知不遠弔古獨徘徊

秋日晚歸

林外紅霞拂女牆征衫初換愛新涼板橋柳色經殘雨山
店鴉聲報夕陽久客不妨甘寂寞微官何必卜行藏蕭蕭
鞍馬秋風裏又見梧桐幾葉黃

汪松字蒼巖漢軍旗人官佐領有早閒堂詩集

山海關

關勢橫吞海波光直接天帆飛孤嶼外城鎖亂山顛俯瞰
魚龍戲平臨日月懸高樓據形勝千里控幽燕

秋夜

牢落深秋候匡牀坐復眠一聲遠歸雁萬里欲寒天隔院
碁何急虛窗月自圓不堪思往事敲枕夜如年

觀獵

烏道盤盤入碧隈，羊腸河曲水潏洄。
蕃王似雁隨秋至，塞馬如雲壓地來。
萬乘旌旗驅虎豹，六軍戈戟擁風雷。
微臣得覩天王狩，愧乏長楊獻賦才。

高珣字乘亭，漢軍旗人，官湖州同知，有茗谿宦游草。

雨中望金山

鐘梵徹雲霄，南風度清響。
客夢忽驚迴，清興共潮長。
披裘犯曉寒，掀篷暢奇賞。
煙雨灑空江，迷濛合霄壤。
中有玉嶙峋，銀濤正搖盪。
金碧晃千層，浮圖兀百丈。
恍如三神峯，縹緲絕來往。
酌酒祝馮夷，請放江天朗。
風姨迴鸞車，雨師撒雲仗。
碧波細於鱗，晴煙送烏榜。
振衣北固樓，俾我襟懷爽。

題轉菴上人小照

少小親戎馬征衣血濺紅心灰百戰後身老萬山中詩思
滿幽壑靈光徹曉鐘十年禪榻畔前事悟真空

七尺枯藤杖閒身挂白雲自稱老禪客誰識故將軍世外
漁樵侶山中麋鹿羣勞生慚俗吏展卷挹清芬

陸鍾輝字南圻號淳川江都人官南陽同知有放鴨亭
小橐

霍家橋道中

江村梅有信趁暎喜追尋沙輦小車疾草枯黃犢侵斷橋
橫野水微日淡荒林我是曾來客廊腰記淺深

佟鉞字秉虔號鈍三漢軍旗人官葭州知州有爾爾齋
詩存

羅浮

十載羅浮夢新秋問海門雲從雙澗合翠擁一峯尊大藥
留丹竈長生贖水源妻梅林處士歸老定何村

陳長鈞字殿元號梅岑武陵人優貢歷官宣威知州有

柱山詩存

寓夜

沅水三千路已賒賈胡留滯漫興嗟半間瓜舍殘書滿八
尺筠牀布被斜月似伴人窺酒盞蟲如對客語窗紗檻雲
已散齋鐘寂惆悵鄉思未有涯

程夢湘字荆南號衡帆丹徒人拔貢官清泉知縣有松

寥山館集

詩話王夢樓作京口五詩人傳以衡帆與余江干鮑
海門張石帆李琴夫之詩合刻之衡帆有句云碧澗
松吟猿梵冷香廚花
掃鶴糧空爲時傳誦

西沆夜行

日夕湖水清蒼茫月明裏水清不受月月出見湖底遙山
隱鱗鱗微波空瀾瀾星星漁火生杳杳拏音起開簾向空
綠一碧見千里空明溯流光沿綠擷蘭芷盈盈杳難卽臨
風懷彼美

西溪水宿

殘月下柁樓鳴禽破幽寐露稀天益澄水遠星初墜遲明
啟篷窗峭寒襲布被時有微風來蘆葦響清吹水花不知
名輕盈送香氣渺矣孤客懷於焉發遐思

南樓對月

孤鴻聲可數黃葉落無多復此南樓月離思渺若何煙開
溧陽樹山接貢湖波明發歸帆遠乘風好放歌

送王夢樓之揚州

金簡紛披會百靈，魚龍曾識使臣星。
天迴滄海千重碧，夢破齊州九點青。
未許游仙求大藥，依然浪迹等飄萍。
孤篷小作蕪城別，臥穩江湖帶月聽。

王道字直夫，漳浦人。官金山知縣，有江湖閒吟。

解嘲

飄飄如漆轉輝光，將老曾無卻老方。
執藝直須龜手藥，保身莫倚麝臍香。
強尋佳句吟常燃，每發狂言怒益張。
謾說太元原可擬，鑄銘潑墨總師揚。

吳貽誠字荃石，一字竹心，桐城人。歷官新河知縣，有靜者居詩集。

檢書吟

日出檢羣書幽窗送新翠中懷偶不平展卷風花墜西漢
尚文章東漢尚節義橫議遭焚坑激揚天所忌出師前後
心侃侃追謨普典午快雄談南朝工藻績宣公奏疏陳諫
果餘真味詩史少陵翁謳歌紀時事韓起八代衰造語開
矐翳歐陽復曾王雄豪美孰繼三蘇思湧泉落墨潮海至
道學尊紫陽韋編尼父志文山正氣歌一字千秋淚厥後
叶宮商梨園矜紙貴雞林帖括佳假借先民意枉費子衿
才何殊優孟戲勞勞讀律家繁賸久師吏刀筆發奇葩他
年公輔器吁嗟魯一儒可以封經笥

秣陵灌花奴

灌花奴老且禿千里來依瀛海曲巧作河陽爛漫春羞爲
白下紀綱僕學圃當年事已空朝華夕秀感秋風主人節

鍼何時謝平泉策策鳴孤桐草茅三徑雜荃蕙傳舍閒田
榛莽封我本秦淮舊花叟花殘木賸身安容知君惜花兼
感舊願守君家花數叢予聞太息還深省往事浮雲催短
景憶昔書生出塞時風霜朔漠圭稜凜艱難磊落世誰知
貂敝硯穿巾笥冷際遇軍中祇白衣歷官清要聲名迴三
十年來特達知開府動名重行省種花能迴天地春要使
奇溫生萬井畿輔家刊墮淚碑祇今父老猶悲哽碌碌灌
花奴家藏十稜書願取橐駝栽樹意甘棠徧植萬千株

重陽遷舍初成小飲有感

瀛海無山尙有樓不登高亦快高秋催租吏少空堂靜種
菊人來小院幽歸鳥片雲迴屋角落帆殘雨下牆頭官閒
始識持螯樂半載蹉跎一醉酬

周彥曾字文羽號半軒丹陽人貢生官太和教諭有文

餘小技

詩話文羽以明經入成均二十年始得學博古涓厓
研經堂集有題半軒詩云向平婚嫁已粗完八十年
華抱鏡看好置詩人巖石裏尋幽問壑老垂竿小園
賦就庾蘭成插樹編籬過一生喬次選人垂廿載冷
官何似半軒清

過友人山居卽景

幽情與物遠小飲傍山村幾折入松徑短牆開竹門吟將
梅共瘦人對鳥忘言風颺餘花落茶煙繞榻昏

沈山

小山石片望嵯峨落日漁樵起嘯歌花覆層巒春氣暝松
鳴幽澗夜聲多當年有客耽邱壑此日何人卧薜蘿我亦
夢中曾一到他時可許結茅過

孫起柎字幼梅一字蘅皋新化人諸生官潛江教諭有
經訓堂詩集

石溪山房

巖石無名譽棲遲谷口耕
鉏犁春雨暗機杼夜鐙明
禮典傳家事徵書畏友生
汾亭鼓琴意垂釣豈關情

姑蘇覽古

橐皋霸業愴威稜越絕書成感廢興
萬嶺風煙趨笠澤三吳春水下
松陵空餘故苑眠垂柳不見前溪唱
采菱惆悵絲蕪槃郢墓跋陀行雨正飛騰

送僕荆南經歷之粵西

篁竹叢中水石淙應官聽鼓踏逢逢
武昌行客今衰柳蠻府參軍此大江
陸賈舊通南粵使祝良新受九眞降
論功

絕嶠看銅柱浪泊威名振嶺龍

彭雲鴻字夷鵠號儀菴甯都人優貢官義甯訓導有情

話編咄咄吟遠游草缺壺吟諸集

詩話儀菴詩多佳句五言如除夕云爆竹鄰山響梅花草屋寒澗河晚望云亂樹迎帆轉飛星逆浪過野
晚影驚紅褪小鳥晴吟亂翠微守風野泊云天如狂
土少青眼浪與愁人俱白頭村夜云夜靜微聞田過
木村孤遙見火當門皆體物瀏亮氣格亦不減晚唐

過家兄牛城山巖遂陟冠石

愛汝無人境拳裳涉淺波雲霞儲廣谷日月側槃阿澗草
參差綠林鶯窈窕歌春山濃欲滴煙樹鬱嵯峨

依險築高垣一冠古製存山川藏栗里風俗辨桃源多難
思經世長歌竟閉門寒崖茶樹在舊業憶王孫

微生

微生率苟且卽事多謬誤青春去我早脫帽白髮露帶劍
出門來不識門前路

夢中立天地不測高與深帳中看日月不辨晴與陰帳中
與夢中疑盡今生心

送郭醉吟歸宣城

潞河酤酒趁斜曛柳暗花明兩岸分
萬里人歸燕市月千峯杖入敬亭雲
老諳世事都鷗跡閒啟柴門到鶴羣
不厭蕪田還種豆南山歌勝北山文

寄萬芝堂懷柔

竹屋蕭疏簇短籬解衣歸卧碧山陲
人生那易驕貧賤我輩何當遠別離
關塞草深官路失江湖天闊雁行遲
重陽風雨愁分手落絮飛花又一時

步溪上

灘迴石側不容槎密篠連雲夾岸斜只恐漁人知隱處沿溪不肯種桃花

汪朝字輦雲一字迂行武甯人優貢官吉水訓導有魚

亭集

詩話輦雲詩名甚噪擬古有古意近體多清越之音
早與蔣心餘楊子載齊名其才不特非心餘之匹視
子載亦較弱韻致固自不減

關山行

關山秋草風蕭瑟戍角悲笳聽不得月照征人望遠心霜
吹暮馬蒼黃色黃雲黯黯沒金微萬里無人一雁飛故鄉
此夜寒碓淚盡入沙場戰士衣

古意

朝陽入洞房春氣吹花暝一心託明鏡照人光不滿三歲
刺雙鸞神態盡委婉甯辭鍼綫勞而使華翎短

江南秋月多江北秋風早不悲秋夜寒獨悲客心老昨夜
夢魂中見君顏色好妾本薄命人顛賴安足道

斯園留別雷東甫正甫

雞黍樂高會行人多遠思策車當此別前路復何之礪水
有歸日山雲無盡時板橋難竟度心在綠楊枝
君歌梁甫吟忽感別離心客子雨中望春山雲外深前村
生野水遠樹息飛禽欲去還回首相期是德音

調琴引

玉蟲光薄釵頭冷秋雨秋風弦上緊十指躡踏鳳不飛螻
蛄聲咽芙蓉醒金徽無語歌未穩相思滿鏡凋鉛粉暮雲

寒破出高庭五更一樹秋紅隕

湘靈曲和子載韻

湘娥一夕淚化作千年雨風吹洞庭秋月照香蘭語渺渺
白波生神弦咽靈緒元鶴立青松高唳刷癯羽蒼梧起素
雲帝子游何許夜夜鼓瑟聲愁殺江頭女

胡鈇字靜菴秦安人貢生官高臺訓導有靜菴詩鈔

蘇武故里

月如霜天如洗雞鳴天曉行人起長安古道何莽蒼道旁
大書蘇武里蘇武禿節單于營垂老甫得歸神京麟閣諸
俊何崢嶸幸附驥尾猶稱榮千古咄嗟李少卿送君河梁
淚滿纓家室灰滅聲名併隴西故居橫棘荆縱復標識甯
爲旌慎哉男子毋偷生

送徐二拓之平番

健於天馬瘦於鶴淋漓翰墨時有作徐君少日稱才人揮
毫得句何清新狂甚不作魯儒態七年浪迹來西秦近者
斂才歸雅正高格雅調學王孟昔如春卉爭妖妍今如喬
木鬱蒼然又似秋空望遠水平沙斷岸羅輕煙嗟子短淺
無所似傲弄詼嘲爲長技君也謂可與談詩唱和奚啻吹
堦篴行吟坐嘯與戲劇碁局洒琰相追隨歡娛未極復惆
悵別予徑行西塞上西塞莽蕩子曾游黃河源連青海頭
此去登高俯大漠脫幘橫槊眞風流到日儻能遣健足急
須寄示涼州曲

懷遠縣

百仞懸崖上危樓望杳冥城連晚雲黑天近午煙青設險

形聲彙音圖卷之十三
三
通傳箭憑高勝建瓴防邊甯藉此烽火已全停

卽事

曉煙無力趁東風十里村原半欲空
春色不知人世事柳絲新綠杏新紅

秋日雨後獨步

遠思如夢復如煙獨對秋空一惘然
處處芳塵迷定處年年冷雨送華年
停雲不解陶潛恨枯樹猶蒙庾信憐
若是三生曾有約眞從石畔問前緣

張如焯字映璧觀城人貢生官蓬萊訓導有松園集

夜過夢溪

南來夜夜還家夢行到夢溪不見溪
漏盡更殘眠未定林間時有子規啼

張開東字賓陽號白蕓蒲圻人諸生官蘄水訓導有海岳集白蕓詩集

宿黃州見友人遺藁

野航橫赤壁斜日下烏林天地風雲靜關河草木深故人千里夢文字百年心岑寂江皋夜悲歌雜醉吟

過潛沔

野花無數亂飄零空屋都成水上萍惟有隄邊楊柳色秋風猶向路人青

金忠洵字古還號硯雲仁和人候選布政司經歷

詩話硯雲爲檜門總憲子富藏書蓄古泉幣嘗纂古泉考手拓泉文面幕俱備自題入絕有句云癡頑不解趨時尙舍卻新錢換舊錢又刻明人說部十餘種爲硯雲甲乙編

題胡菊圃重蒹葭話舊圖

西溪窈且深乃在山之麓伊人結同心面流構茅屋秋水
助微吟山月待宵讀一旦躡雲梯雙清臘梅竹寥寥六十
秋勝事指樵牧今披尺幅圖風流忽在目不惜買山錢相
約緣俱宿他時鼓棹來蘆渚傾醪醪

曹煥字乃文號瘦山嘉善人貢生候選州同

· 懷秋門乍浦

聚感鷗羣散感萍玉簫聲咽不堪聽故人忽寄新題句直
補淮南相鶴經

晚晴簪詩匯卷八十五終

晚晴彞詩匯卷八十六目錄

馮祝 三首

張曾 六首

顧于觀 四首

黃標 六首

張錫祚 四首

蔣業鼎 二首

張大受 三首

江昱 五首

陳深 二首

顧成志 二首

葉舟 二首

程之鶴 三首

李薊 二首

程兆熊 三首

陸炳 三首

金玉鳴 一首

曹相川 一首

鄒漪 一首

袁景輅 八首

張岡 四首

程芳銘 四首

劉夢熊 二首

王廷魁二首

薛龍光二首

黃振三首

王玖一首

施鴻勳二首

楊法三首

張夢喈一首

顧甦一首

高景光二首

趙曉榮一首

顧鴻志一首

鮑岡一首

王元文一首

桂心堂一首

王鼎二首

張琦二首

陳毅三首

周琳一首

張自坤二首

晚晴簃詩匯卷八十六

徐世昌

馮祝字古浦號欄堂婁縣人有一樓居詩藁

詩話古浦布衣工詩晚歲客游居鄂文瑞幕最久其馬龍九日詩有英菊三年驚鬢老桑榆萬里幸身強句歸隱年八十四卒吳省蕭刻其詩於藝海珠塵中

次和鄂制府紅優曇花

宛對瞿曇座拈來見夙因蘊空仍有色示現豈無神品淨
心方潔香凝妙絕塵塗脂非慶喜須識髮華身

獨秀峯在桂林城內貢院後旁無培塿坡陀特起如
浮屠登其顛俯矚院中時假爲制府行館上元前
後於峯之上下張鐙設燕此粵西僅見之盛事也
獨秀峯高壓暮煙六齧齊駕繞諸天長春國傍星輶起不

夜城瞻斗極懸藻火爭輝排繡闥燭龍銜耀照華筵已將
聖澤開生面百粵風光拱萬年

雲塘晚步同湘皋巢雲

聯步尋幽處雲塘細路偏空山無俗客野水自涓然原隰
千家望松杉幾鳴連有亭堪眺賞徒倚夕陽前

張會字祖武一字組五丹徒人有石帆山人集

詩話祖武自號石帆山人不習舉子業以詩游歸愚
之門當時推與鮑步江齊名英夢堂相國官鎮江時
提倡風雅步江石帆同為上客石帆後游京師客相
國邸又數年落拓不偶相國贈詩有依人久識孤王
粲之句法梧門論鮑步江二人詩謂石帆之煙鳥去無
盡風潮來不知與步江之山光終夜曉海氣不時秋
寫焦山景皆確切不移石帆集中歲除前二日同步
江登木末樓有句云歲臘共驚三日盡江山如待雨
人看尤足見其自負

夜過平望同陳東時作

冒雨理歸楫披衣坐晚寒
鶻聲兩岸急人語一鐙殘
此夜追歡好重來把臂難
忽聞漁唱起鷗鳥下沙灘

雨宿焦山

巖光驚早起江閣雨殘時
煙鳥去無盡風潮來不知
櫻桃分餉客芍藥對題詩
四月中好幽禽莫負期

五州山

蘿磴上空際禪房深翠微
崖陰春不到松激雨常飛
落葉埋樵履寒雲戀衲衣
五州遙極目幾點散煙霏

登凌雲亭

水光秋變白石骨冷逾青天
地能容我江山著此亭
沙沈尋折戟酒盡棄空罇
日暮悲歌起蛟龍不解聽

丁卯橋

詩名直到今橋斷蹟難尋落日人獨立春風鳥一吟徑幽
蒼靄積石絕碧苔侵惟有溪旁水年年自賞音

步江同紫芝焦山讀書寄懷

九月焦巖已薄寒海門高處落風湍秋聲一夜客同聽山
色滿江人獨看燒葉照書蠅舍好剡苔讀字鶴銘殘遙憐
燈火三更雨清磬泠泠度遠灘

顧于觀字萬峯號澥陸興化人諸生有澥陸詩鈔

詩話萬峯精書法與李復堂鄭板橋友善數奇不偶
刻意爲詩縱其才力之所至而馳驅就範流麗雄超
不落窠臼

京口曉望

萬戶沈蒼靄鳴雞出翠微江聲自流轉秋色靜依稀海日
千峯出吳船一棹飛東南形勝地蕭爽有餘暉

北極閣

鍾陵積秀邈霏微北極臺高山四圍樹底人家蒼翠合雲
間樓閣亂紅飛湖煙北望迷春草江勢西來捲夕暉下去
玉階承輦處牧兒橫笛打牛歸

癸州試院後有宋皇子魏王節度使碑院故節度使
第

立傍殘陽看古碑雙松殿角隱蛟螭河山一去成千古笙
鶴重來是幾時複道雲深迷客屐叢篁春盡老孫枝浮圖
空外聞鈴語瑣院庭閒月上遲

長橋

長橋跨通川明星動川底風吹橋上人雲隨衣帶起

黃標字紀堂揚州人諸生有紀堂詩集

詩話紀堂謂生遭聖明白首不見兵革無驚霜泣露
悲風愴月之詞草莽處土無越分以涉清廟明堂之
句老死不出鄉里終其身無遷謫之憂江湖之役惟
安居樂業日求同輩徵歌博飲以養其天年故其詩
不爲無病之呻意境雖淺時見天真

重過長干里有感

兩經霜露動深哀況聽秋聲木末來江上重尋鷗鷺侶雨
中復上鳳凰臺千家古里連青陌六代遺宮長碧苔此日
登臨多感處百年懷抱一時開

金山樂閑上人山房卽事

似泛蓬壺萬頃平凌虛畫閣接層楹雙鑪石乳壺中液一
榻江流枕上聲留座自慚無玉帶設餐多謝剝金橙與公
應有三生約他日雲山是主盟

游西溪寺

帆落秋溪水人登夕照山古亭穿竹徑勝地入松灣石潤
雲猶溼花深鳥自閑老僧知好客煮茗未容還

過鐵佛寺懷古

爲探幽意過西郭古寺曾聞此地偏黃葉路深埋斷碣黑
雲兵盡散荒煙當年淮右雄藩鎮今日吳宮拱墓田憑眺
不堪惆悵處半林疎影石壇邊

雨中泛舟登尺五樓

密雲低垂覆四天平湖水滿春放船青簾白舫蕩波出千
縷萬縷楊柳煙柳畔朱樓聳翠碧飄渺直踞松雲巔主人
欲住不可住郭巾謝屐紛後先我欲括衣尋箬笠拍手笑
殺蘇子瞻風淅淅溜懸懸繡櫺綺棟凌飛仙爲君躡足探
兩窟雨中花嶼千枝然雲漠漠水漣漣我昔畫舫聽雨眠

印册卷言匯卷ノ一
猪紅熊白泛春釀此景不再幾十年會當更趁迎梅雨解
盡杖頭沽酒錢

送許巢余禮耕游攝山

聞道先生買桂舟片帆風發水西洲金繩世界千華曉玉
鏡山川萬葉秋好句徧題王粲筆清樽羣奉謝公游遙知
煙月空濛夜人在蚪龍最上頭

張錫祚字偕行一字永夫吳縣人有啖蔗軒詩鋤茅遺
稟

重九後溪南采杞菊

佳節修復過寒商激林杪霜清杜若洲花發蒹葭島空庭
無嘉卉何以慰幽抱緣源路轉迴穿林人漸少朱實披榛
叢黃花掇香草尋異心無厭適已物逾好卽此俗慮遺迨

遙可忘老

訪沈石田故居

抗心希古賢閒情緬高士孤舟渡平湖日落遵枉渚逶迤
入荒村徘徊覓遺址人語散鳧鷖草長眠鹿豕何處有衡
門田中問孫子

謁韋刺史祠

平生輕吏舍祠宇傍宮牆誰載花林酒來分畫戟香道心
棲野寺詩思冷秋塘日暮瞻遺像斜陽正滿堂

過廬老人鶴園

閒日窮幽賞行行過水田竹籬遮老屋花氣散晴川曠野
無車馬斯人得醉眠何曾謀鶴食四壁正蕭然

蔣業鼎字升梅長洲人諸生

詩話升梅風流好事年未三十而歿其祖樹存營築
繡谷於桃花塢園林佳勝康熙己卯約送春之會座
中尤西堂年八十餘沈歸愚甫逾冠皆有詩王石谷
畫長卷紀事至乾隆己卯歸愚年八十七升梅復會
名流廿餘人王存懷復爲之圖又名妓張憶娘爲顧
俠君惠半農所畚樹存曾作簪花圖升梅出屬座客
題詞吳中
傳爲嘉話

寒夜

寒風發清響木葉忽紛飛微月澹樵徑疏煙生竹扉隔林
深犬吠遠寺夜僧歸閒步尋幽興相于擬息機

送王蘭泉先生歸里

尊鱸歸思滿吳淞渺渺江雲隔幾重畫舫柳垂春鬪酒香
林梅發曉攜筇暮潮雨歇過三泖明月煙深到五茸何日
更來尋舊約寒山同聽夕陽鐘

張大受字若谷一字可之號蔚園常熟人諸生有蔚園

詩鈔

謝註若谷著述有毛詩翼注黃河圖說讀儀禮述暨
其他詩文數十百篇炬於火阮於盜十存二三香落
可憫

過釣臺作

炎祚重開累故人青山獨往得閒身
帝方卧榻容酣睡客自披裘愛隱淪
中古巢由非異事東京風節播清塵
江流千載澄空碧不負先生舊釣綸

重過蘆溝橋

羣峯西連太行起一水東注滄溟開
神京門戶重襟帶長虹跨空勢壯哉
千輪萬蹶日來往此中榮悴分霄壤
名利驅人不覺停消磨螯石平如掌
無端我亦到京國重過應嗟題柱客
愛看形勝更徘徊曉風殘月他時憶

桐廬

縣小渾成市山多半入雲空江煙雨裏何處問桐君

江昱字賓谷號松泉江都人諸生有松泉詩集

大禹開山幣歌

開山幣自神禹遺斑駁疑帶衡華泥幕文表役古僅見隨
刊想見躬胼胝此時司空初升石夷野考代當屬虞帝制
叶九鼎淪亡法物盡寸銅足寶參敦彝荆揚貢金錯三品
八年帑給先不貲或言太公始勦九府法得無好事矜贗
私不知泉貝之利肇已久洪範食貨疇衍箕禹采厯山著
典籍讀書不到徒多疑垚埤鑄文緬在昔況值帝終王始
風會移懋遷有無類粟帛安能交易通毫釐奏庶艱鮮暨
益稷肯憑威令奔窮黎靈異或稱黃龍應龍助烈焚亦非

一手一足支將建平成地天績區區豈恃公旬期若論爲
民用民力後何當逸前何疲舟車樞權急已溺偉義非可
繩蚩蚩後世動眾急鼙鼓水衡錢亦專所司本平人情乃
王道漫云不距先祇台摩挲鎮日增桑歛媿氏明德遙堪
追聖神所作定有赫厭火應敵岫嶺碑川澤山林佩以入
神奸不若紛遠離要之至寶不論用所貴卽物能見德叶
直爲萬世作表式珍重勿替同元圭

正月五日集唐石土柳巷新宅以楊誠齋五日詩印

我青鞵第一痕分韻得我字

居愛柳巷名不見柳婀娜應如青白楊住蕭春何妥主人
頻年出館于淮陰傳座喜招我氣和風日閒生槃樂笑瑤
簾戶爭春新瓶梅紅欲哆并州此故鄉家山榜檐左石土門

人以其鄉山題所門臨小秦淮水生促行舸又將暫聚聊
居曰五華山房是日香溪欲以誠齋句爲

盡歡苦吟譏飯題

韻人各七首眾不果從

買書限韻

積書儼足國生聚富稻蠡但得萬軸藏何惜千金解紅牙
插縱橫青氈坐瀟灑查檢走小胥編題付阿買案蟬乾苦
勤漆椀搬笑駮願充肩經郎免作觀場矮攜瓴借異本懷
餅鈔細楷恐類春明坊賃屋錢漸夥

辛未臘月香溪先生爲題擁書圖次韻奉酬

擁書不讀徒百城蓄酒不醉以酒名忍貧遠媿古人守閉
門吟出饑鶯聲新詩似嘲困蹇束是愛非嫉若治禿淮南
子親母治禿血梳滿耳過者以爲愛囊錢旣誤書亦荒尙要空
也使其繼母則必以爲嫉矣

券入場屋

文同詩場屋聲名四十
年五庫書誤一囊錢

過雁落山莊有感寄舍弟衡州

桐柳蕭條門井傾重來江令不勝情一家骨肉分微祿兩
世松楸託友生村塾年饑荒短學疲農病起事冬耕藍田
縱使他時共白髮應憐弟與兄

陳深字壑淙丹徒人

詩話英夢堂相國官鎮江同知時提唱風雅
壑淙與鮑海門張石帆輩皆壇坫中眉目也

秋日過象山洞

秋來心跡戀江湖山閣秋心病強扶鯨背斷雲飛塔湧鳥
邊斜日峭帆孤可憐落木思公子一任悲歌逐酒徒誰復
登高能賦者參軍才已擅冰壺

初春英公夢堂招同張墨岑張曉村鮑海門張石帆

焦巖雅集

海國披襟過雨初尊開山閣曉鐘餘潛蛟抱凍江濤靜老
鶴盤雲島木虛已分縱游忘吏隱況論高跡託樵漁知公
盛業滄洲在好出龍門自著書

顧成志字心勿太倉人諸生有怡齋詩存

讀李客山先生武平分水勘定界記

鄙人漚營魯人怒筐筥爭桑構吳楚尙聞六里作鴻溝彼
粵此閩關如虎閩邑曰武平連粵平遠城天子頗聞粵人
橫負眾侵疆狎縣令詔書特赦兩銅章判以溝涂毋力競
武平許君氣何豪單輅來會分水勘卻聞隱隱鳴鉦鼓忽
見青紅旗亂舞車中一笑此何爲回頭從者色如土野雲
黯黯日將落脫轄呼人無一諾獨揮羽扇抗羣咻風馳雲
合圍戈矛桓桓許君神色定親把輿圖作明證健兒突入

欲甘心拉虎批熊隻手勝是時許君起大呼么麼鼠子敢
犯吾揮刀折齒前令胡吾能殺汝如腐雞廣福橋頭故吾
土赫赫鬼神可欺乎朝廷威行九州外爾等跳踉行盡屠
萬夫垂頭齒打舌旗捲槍拋各求穴鞠躬謝罪辭伊嚶彼
何人哉平遠侯立石巍然峙坳頭我疆爾界標千秋吾聞
汾陽王入鹵惟單騎昌黎書生耳鎮州強不避爲國焉能
更愛身渾身是膽發乎義懦夫畏賊掩耳奔不惜巾幗羞
三軍天下英雄竟誰是千載而下乃見今許君許君老友
曰李子慨然奮筆識終始發難能令壯士驚折衝足雪讎
生恥此事此辭炳日星我欲大書千本與萬本張之凡百
有位庭

蘭芽雲吟山房作

素心渺何許不見一年矣春風落階前陳根發泥底有如
思故人忽得書一紙感此芳訊難欣然願覲止敷榮不求
媚遲遲若有俟煩爾種花翁晨夕候之子

葉舟字布颿江都人有石林草堂詩存

歸朱老匏先生墓碣

莽莽荒原生野煙橋邊識碣總前緣披荆尋入亂墳裏把
卷放歌斜照前時汪蔚伯誦先生自輓詩以當誄文七字幾枯殘淚滴一杯
翻仗故人憐墓碣係高西唐八分書側鐫宋默夫七律一首招魂此地餘詩骨瑟

縮寒風吹紙錢

觀禹廟壁間所塑山海經圖像

淮海維揚古澤國浮山作鎮傳非戒禹廟恢張嘉靖間殿
陸崢嶸傍山側我家舊住郡之東偶來瞻拜思神功壁間

山海設圖像雕泥鑿木何搜窮其間似獸非獸人非人有
羽有介有鬼神首自招搖貌獸族如禺耳白名狴狴此類
奇形共五十滿壁詫訝徒續紛次及羽禽始鵠鶴二十二
種形狀殊六目六足三首翼卽此可以觀其餘更及旋龜
計鱗介鳥頭虺尾吁足怪此類分形又三十在水在山各
殊界神祇拉雜其中列鳥獸鱗介無分別若者險阻助功
成若者戰鬪遭鋒鉞驚看異域更奇絕少見多怪難爲說
或長九寸十丈餘或爲獸體或爲魚或止半背或數首胸
生洞穴穿其軀予齒去角不足據付翼之說徒爲拘輾轉
徘徊兩廡庠依經塑立原非假當年洪水橫流時異類紛
紜徧天下萬古生民仰禹功請看四壁塗丹赭

程之鷄字羽宸又字采山歙縣人貢生有練江詩鈔

黃山登光明頂

山心高望四無極，迴合煙嵐恣登陟。六六峯推一一奇，到此輪靈咸效職。蓮花如幕列侍臣，洞中待漏光常黑。老人天外進硃砂，多自軒轅臺畔得。翔舞青鸞報喜音，歌爲上壽丹書勒。西走獅子東飛龍，吼號天矯憑封勅。惟有天都稍與齊，九百仞餘通氣息。他如羅列實附庸，北把雲門對南直。我欲長呼絕頂間，摩挲頸項天風拭。惆悵眞仙招不來，容成陳迹浮邱匿。昂藏磊落丈夫身，何用吞霞飲灑力。掉頭返照迫蒼黃，曠峴倏變金翠色。朝天萬笏晚朝開，此卽中天一海國。

泛東沆游張公洞

破曙凌蒼煙，片帆東沆指。蒲葦散鳧鷖，蓼蘋跳鯁鯉。五雲

擅荆南罨畫茶煙起行行口卓午循麓蜀山抵甕牖丁山
來車載搗泥紫湖汊取次到捨舟巖壑裏孤杖眾同行披
莽臨山趾先從後洞窺小口磬同擬延步幾遠巡冷風洞
中起鮒背聞滑油窄不易容跬前洞旋復登敞深一門啟
琪林樹蔽虧層疊石魄礪霧氣洞底橫一白渾疑水瞪睇
下層崖玉柱排銀齒豈然石燕飛撲漉翻不已石牀辨模
糊石竈火熄矣石髓滴琤琤天然乳結藥須臾迫日暮亟
欲回仙履尙有後客來相待同徙倚從來神仙窟往往足
至理豹變難窺全管見詎測蠡留取待芳春恣游窮復始

庚申七日

今夕何夕是巧夕愛說人間七月七瓜果筵陳事綺羅飄
香嬌妮妝樓側對月臨風鍼綫多五色纓穿九孔隙天家

會合正團圓那許人間餘巧乞我愧無書腹曝庭空負亭
午當空日千里鄉心又隔年女牛亦笑人離別銀河昨夜
經雨餘鵲路塵清更如滌還訪君平賣卜人靈槎重覓支
機石

李薊字嘯村懷甯人諸生有嘯村近體詩選

詩話嘯村以詩爲諸侯客從盧雅雨游既卒
雅雨爲刻其遺藁專選近體蓋取其所長也

焦山

別開生面水爲鄰風鼓煙鐘澤國春海底勒銘猶有石山
中卻聘更無人浪攻彼岸千層雪樹辟浮圖十丈塵不共
滄桑容易變請看周鼎至今新

早起

不待雞鳴起披衣正覺寒佛通花智慧人與竹平安霜氣

撲簾重鐘聲出檻殘伊蒲香積滿早已辦朝餐

程兆熊字隱藩丹徒人有淚雪吟卷

詩話隱藩詩有晚唐風格嘗與其外舅張石帆韓京口遺音集而未成有志感詩八首標舉眉目韻致不減漁洋論詩絕句後張寄槎王柳村繼之乃成京江耆舊集

苦雨

隘巷春風少蓬門細雨多病增愁母覺酒盡愧朋過短髮
輸芳草流光逐逝波自慚生計拙終歲任蹉跎

早春送殷芷溪返吳門

柳色初黃花未飛春光正好又言歸客囊羞澀惟詩卷故
里荒涼賸竹扉廡下賃春身欲老江邊把釣事全非可知
去住皆無著莫怪臨歧淚共揮

柳青橋訪潘江如先生故居

高士淪亡久書堂賸落暉空憐芳草路祇有白鷗飛悵望
春江晚蕭條過客稀年年橋畔柳猶自拂人衣

陸炳字赤南號藜軒丹陽人有劍囊草

獨酌

迢遞雲歸山徘徊日沈閣鳥還月漸明空庭何寂寞客思
苦無聊銜杯成獨酌酒狂起欲舞拔劍搖霜鏑意氣如河
山平生重一諾如何反覆情大義同糟粕棄置勿復言貧
當甘藜藿

晴川

晴川書觸目亭午水波明舟疾驅山走雲遲礙日行石苔
齊草色岸竹聚風聲惟是尋幽處由來世莫爭

寄茂州張左虛使君

離情何所極滿眼盡關山芳草通千里孤城繞百蠻功名
邊地遠心事鬢毛斑雨露春應足無愁鏡裏顏

金玉鳴字虛船號曙岑江南山陽人諸生有尺牀片草

秋夜

金風夜起暑初收吹散繁星大火流河漢晴連三島月梧
桐雨洗一天秋楚坡冷落枚臬宅長笛依稀趙嘏樓獨宿
聽殘宵漏永詩成枕上暫消愁

曹相川字岱芝號鎔齋金山人諸生

不寐

宵短難成夢堂虛易受風吟螢來遠近飢鼠過西東百行
脩成道三餐逼作翁側身天地闊又見曙光紅

鄒漪字棹煙號嘯軒常熟人

晚眺

木落洞庭晚蕭蕭滿地秋冷雲橫古寺寒月逼江樓菊瘦
還簪帽鱸肥恰上鉤平沙飛雁下莫作稻粱謀

袁景輅字質中號樸村震澤人貢生有小桐廬詩鈔

詩話質中學詩於歸愚與王北溪元文顛蔚雲汝龍
諸子結竹溪詩社搜集國朝詩家爲松陵詩徵二十
卷甫卒業而歿年僅四十四歸愚序其詩稱詩甚至
近於溢美但能諱守唐人矩矱清婉處自不可及

宿藏雲閣

白雲滿空山小閣不知處我再入雲中閣上雲來去松柏
繞山青泉聲隔林樹此時身與心一一煙霞趣欲去仍此
宿白雲留我住

登雲巖寺浮圖

平曠聳孤峯古木影交翳山巔塔玲瓏高湧出雲際茲山

多樓臺陟高目無蔽遙山數點青色滿天地吳都百萬
家一綫圍埤垠千里顧盼間勝概無與儷游者自崖反曠
懷此獨契坐待明月來風鈴遠搖曳

登羅星洲文昌閣

春光無近遠往往在僧寺地靜心亦清寓目皆生意小閣
水中央四顧臨無地纖鱗戲萍末初鳥鳴天際波濤擁新
色雲巒落空翠一一閣中景盡洩三春祕登覽曠心神余
懷此獨契

九日古愚丈易門蔚雲芝房東巖家竹軒愛吟齋小
飲并結竹溪吟社以菊花開日卽重陽爲韻得卽
字

雁過白雲冷木落遙山碧游筇懶不攜良友近可卽平地

當登高少長集吟室有酒期共飲歡焉布瑤席座無拘忌
流醉醒取各適襟情未必同臭味自不隔古人師與友所
重均受益後世務面交毀譽亂曲直攻玉藉他山引鍼賴
磁石各勉百年身磨礪互盡力是時日欲暮寒光動西壁
照見座中人各有好顏色聚首苦不常歡飲忘主客相期
敦久要觴詠繼今夕

夢與蔚雲芝房東巖同游羅星洲賦詩題壁覺後忘
後半因足成之呈三君

方蓬樓閣水中央與客登臨共野航一鏡空明涵遠近幾
村煙火入蒼茫夢中杯酒聯新句覺後雲山各一方遙憶
殘鐙孤館裏可能有夢到江鄉

泛舟至雷峯復度嶺憩淨慈寺

山靈久我待既見不可緩舍館且莫定呼舟任游衍風便
向南湖斷塔聳遙巘漸近益崇高頂樹紛可辨風送南屏
鐘引我足逾健出雲復入雲上阪更下阪古寺隱湖曲路
轉忽到眼殿角干青霄丈六金光滿更披虞集碑宣揚仗
軒冕憩坐息筇杖松風冷然善山頂暮樵歸背負斜陽晚
一徑通四山可近亦可遠我欲往從之白雲忽遮斷

紫雲洞

洞天猶數武清風逼人冷既進訝然開塵煩先自屏巖隙
透天光仰望疑坐井旁穴穿地底窅然落深迴平進可深
達曲折通後嶺同行戒後怯有志鼓前猛中路苦偈仄蟻
進步難併輾轉又宏徹夷險判俄頃更深趾不受隱隱路
脩永空響幻波濤白晝半昏冥坐久心骨寒復出來時境

人生煩熱胸到此須一省六月斷炎暑重來煮新茗

丁家山

連岡如羣龍一氣陡入水飲湖湖不乾忽又昂首起遠望
既聳峭近睇亦秀美雖臨一角湖塵喧不謀耳登高望平
田傍水成疆理遠林露茅屋時來荷鋤子奇石森綠蕉更
列牀與几何當一曲琴坐待月來此

張岡字崑南號古樵長洲人有鶴健廬集

晚至聖恩寺宿四宜堂

暮隨白雲至山月尙未出言尋石門幽谷口煙蘿密欣逢
採樵人招我入禪室曇花空外香石溜巖下急虛堂面五
湖碧動軒窗色浮生疲津梁茲焉偶棲息聞鐘寒不眠風
竹聲蕭瑟

歲暮送友人之吳興

復作蒼溪別依依歧路間斜陽孤櫂客晴雪五湖山逝水
看東去冥鴻聽北還天涯當歲暮想像鬢毛斑

登堯峯作

夙昔聞堯峯游心歲已積杪春羣物秀及茲事清適路轉
峯西偏蕭條但松石飛泉若風雨淙淙下絕壁向晚猿鳥
嘯時還見樵客緬彼五湖水東逝自古昔煙波碧如此人
事幾更易請從支遁流空山共禪寂

秋夜雨中集企晉園中卽席感懷亡友亦瑜

秋暝松窗燈火虛故人清宴子雲廬嘯殘林鳥空山靜落
盡汀蘭暮雨疎對酒尙吟思舊賦論懷休擬絕交書相逢
盡是江潭侶重向秋風問索居

程芳銘字新一字滌軒寶山人諸生有一枝樓吟草

玉山草堂歌

楊柳蕭疎拂綺窗芙蓉爛漫開秋江涼月娟娟露華白漁
歌欸乃歌輕艫玉缸香泛流霞席搗箏小伎來迎客素手
高擎鸚鵡杯朱唇低按霓裳拍此時月色明秋河蕪澤微
聞酒更多麻箋已度花游曲蒼玉重翻鐵笛歌紀昔流傳
玉山第舞榭歌樓綺藻麗更築幽居號草堂奇禽珍玩開
清閣桐帽棕鞋去不還餘錢買郭惟青山鴛鴦彈盡驪駒
曲鴻鵠空棲流水灣幾年佳處題名改舊址猶留玉峯在
賜第新開棗竹堂忠貞並入青編載三百年來憶勝游漁
莊臺榭成墟邱芙蓉落盡紅顏色楊柳飄殘過客愁馬鞍
山前十里路禾黍秋風起煙霧學士徒瞻顧相祠行人但

識歸公墓文莊舊宅已蒼涼鄭氏園林亦久荒茜涇西望
界溪水湘湖雲樹俱茫茫

擬登泰山懷古

神房阿閣訝然開玉策金函訪道來不是秦皇能羽化豈
知漢帝有仙才燕齊怪士空聞語遼海仙人候不回自是
鼎湖龍去杳山形終古隔蓬萊

少年行

玉勒金羈百萬錢五陵車騎日翩翩樂游原畔爭相問一
曲胡姬酒肆眠

銅雀臺

漳水東流去不回繡緯寂寞烏嘯哀夕陽一片西陵土曾
見宮人歌吹來

劉夢熊字坦茵號蕙圃丹徒人有蕙圃寄吟

月夜南樓漫興

月出江南好山光浸碧流平生多古意第一在高樓天遠
人何處高懷我欲秋不關情思迴身世久浮鷗

哭鮑海門

組綬翻嫌近釣名羨君綺歲句從衡玲瓏玉鏤窗前色飄
渺簫傳海上聲逐鹿中原輕秀水爭袍內苑藐新城少微
星隕詩篇在萬古江河對月明

王廷魁字岡齡號盤溪吳縣人諸生有小停雲館吟藁

登天平山

何年巧斲龍門路側身石縫迷窘步分明從此隔人間梯
空仄磴穿雲霧探奇髣髴達天都松花飄落來虛無銀房

石室隱崖谷山茶活火然僧鑪白雲冉冉自來去半嶺鐘
傳泉落處鮮葩錯雜吐幽香梵宇凌空接仙馭披襟直上
最高巔下瞰萬笏浮春煙湖光浩渺望不極琉璃倒映丹
霞天

題陸野塘高士松陵入景

昔賢觴詠地展卷認幽棲人領天隨趣家臨震澤西夕陽
帆影亂秋水雁行低便擬鱸鄉去行吟續舊題

薛龍光字少文上海人有酌雅堂詩

野泊

日落煙蒼茫停舟傍野渡繁星溼春江殘鏡隱孤戍夢破
柔艣聲寒宵自來去

垂虹道中

夕陽紫靄濃萬頃浸秋容帆出渚中渚雲歸峯上峯鱸鄉
老自好橘社逝相從幾兩人生屐休辜六尺筇

黃振字舒安號瘦石如臬人有黃瘦石橐

古澹園

一徑秋陰向晚天小園緩步意蕭然水衣綠破崩崖底霜
果紅敲落葉邊屋倒祠堂留古像人亡臺榭剩荒煙亦知
名勝終難久太息何曾有百年

送王春明十二歸錫山

秋深黃葉裏人去斷鴻邊落日低帆影鄉心隔水煙山寒
江上色詩澹世間緣好結臨厓屋觀書種秫田

羅兩峯來寓雨香精舍同片石梅原賦詩用臺字

雨香舊址有高臺自古登臨到此來千載文章秋鬼哭一

番鐘鼓斷鴻哀無端落葉因風聚何處寒雲向夕開我是
悲秋老詞客斜陽衰柳自徘徊

王玖字次峯號二癡常熟人諸生

詩話次峯爲石谷曾孫
畫字家派能世其傳

爲王蘭泉作三泖漁隱圖並題絕句

打槩入空明橫橋出秋嶼人在釣魚汀如聞隔煙語

施鴻勳字紹六長洲人貢生有功園詩鈔

太白酒樓和願星橋韻

太白不可作猶存舊酒樓憑闌斜日淡放眼亂雲流鄉國

千山杳登臨萬象秋桐花題句後星橋於殿前賦桐一一
花詩欽定第一

寫新愁

梅花村訪浦鶴天

此詩集言羅卷ノ一ノ
一ノ
梅開深處卽孤山高卧柴門晝亦關踏破蒼苔人不見立
殘清影鶴初還尊中酒滿常拌醉驢背詩多卻費刪珍重
東君留索笑漫勞驛使一枝攀

楊法字孝父又字已軍號石宓江甯人

飲鄰家作

一兩八九日未嘗出門戶今日天氣佳迺向鄰家去主人
能清靜養心借章句落落寡所諧喜我來相顧既盡賓主
歡頗得酒中趣物我跡俱泯何思復何慮卻愛古之人醉
鄉卽長住

題于野種山亭

曲巷深藏屋空庭白晝閒書殘老樹下心澹菊華間聞說
多幽事秋來夢種山信知邱壑僻寤寐亦相關

咫尺幽奇境青鞵不厭過一庭堆落葉雙樹靜交柯坐久
疑空谷看雲覆女蘿側身天地外歲月任消磨

張夢喈字鳳于號玉壘江南華亭人諸生有塔射園詩

鈔

雨不止

四野人聲靜惟聞檐瀑喧窗捎花影重徑壓竹枝繁伏枕
宵猶歲攤書晝已昏何時步邱壑策杖倚朝暾

顧甦字瞻麓吳江人

雜興

睡味甜於蜜詩情冷似冰養疴先斷酒愛寂并疎僧花落
從風掃窗虛見月升吾廬誰共此靜對一枯藤

高景光字同春元和人諸生有桐村小草

懷曹劍亭

京華六載別風度杳難攀
日下魚書斷天邊鷗夢閒
春帆黃歇浦秋色陸機山
何自攜尊酒相從一解顏

訪劉伴霞鍊師不值

擬親古鏡照心心來訪
仙人紫府深紅棧青岑
凹凸畫雲衣月幌短長吟
叩門穩卧松間鹿放艇空
張花下琴兩到山中不相見
臨風搔首憶劉沈

趙曉榮字陟庭嘉定人諸生有闕古山房詩鈔

滄浪亭

佳憩高秋得孤亭曲徑通
喚人空鳥語照眼自霜叢
古寺寒煙裏遙山夕照中
緬懷蘇長史明月與清風
顧鴻志字學遜奉賢人諸生有遜齋學古初編

寄凌叔子

歲宴山中桂樹枯思君渺渺海雲孤春生驛路花開未雪
浣征衫雁到無才子京華愁旅食散人笠屐隱江湖誰憐
水國三千里煙水蒼茫一釣徒

鮑岡字雲策常熟人

憶棹煙

雙屐久不來花徑莓苔長薄霧暝前村春泉落清響好懷
誰共言枯坐靜塵想不知修竹間朗然明月上

王元文字舉會號北溪吳江人諸生有北溪集

東巖別後有憶

相晤了忘情相別還增慮入暮獨登樓幽懷澹無豫遙憶
煙雨中孤舟泊何處

桂心堂字苧眉上海人諸生有杏花書屋詩藁

棉田薙草行

東鄉土高宜植棉久雨草長青鋪氈田家婦女停織作趁
晴盡出芸中田田在草間草沒踝赤日行天烈於火手不
停鋤汗滿襟面目都化城中黔暮歸驚聞嘵徹戶呱呱待
哺兒飢苦哺兒更慮奉姑遲急入廚中煮粥糜彌月勞勞
心力計棉高漸見花鈴綴懸耜惟思弄機杼誰知及早完
秋稅

採蓮曲

風吹藕花滿路香中流蕩槳誰家娘隔岸愛尋雙菡萏迴
波驚起兩鴛鴦採得蓮心無所寄藕絲不斷繫人腸

王鼎字祖錫號香浦一號條山江南華亭人諸生有蘭

綺堂詩鈔

和張漁山憶秦淮春柳

多半春藏畫檻邊
酒醒人困絮飛天
生憐南國桃花漲
慣繫東風鴨嘴船
繡箔吹香邀燕舞
鈿箏彈怨惱鶯眠
板橋斜日依稀是
小別嬋娟又一年

泛舟太湖

雙帆翦破碧玻璃
秋色空濛望欲迷
七十二峯何處好
夕陽一角洞庭西

張琦字映山吳縣人有蒼雪山房集

詩話映山客畢弁山尚書幕中與孫淵如洪稚存諸公游詩無俗響詠老少年云是草獨無遲暮感不花能傲豔

陽時
雜興

本無軒冕志來結松下廬東皋微雨過願言事新畝開我
牀頭甕擷我園中蔬鷓鴣巢深林一枝不求餘但檢草木
疏而無貨殖書心不爲形役此樂誰能如

登攝山最高峯

初疑天際峯鳥飛不可度石磴幾盤旋忽到絕頂處漸覺
遠村低微茫隱煙樹長江拍雲來欲挾眾山去上方猶夕
陽千林黯將暮立久薄寒生客衣溼雲霧我生幸何如得
投靈境住心靜聞天香超然發深悟

陳毅字直方號古漁上元人有古漁詩概

曉過黃葉嶺

嶺頭孤店小一徑與山分曉日明高樹籃輿破白雲野花
村婦髻亂石古人墳黃葉初飛處秋聲不可聞

湖港阻風

刺骨寒風歎石尤煙波東望迴生愁早霜紅樹藏湖岸殘
日青山滿柁樓已覺空囊歸故里何因歧路感深秋思量
蹇滯平生事來去還應笑野鷗

懷蔣愚谷歸吳門

我聞蔣詡三年餘訪之未遇城南居昨叩松扉問童子言
向岫屢求神書蒼煙滿空暮色澹紅日下江天影虛太湖
七十二峯色登高不見生躊躇

周琳字定生吳縣人諸生有高山堂詩鈔

暮春游貝氏園

一徑穿林谷垂條冒角巾小亭浮樹杪古木卧溪濱花氣
能留客泉聲解送人恩恩理歸棹落日滿城闌

張自坤字此亭丹徒人監生有頤齋僅存草

秋夜凌江閣與年瘦生談往事

征西往事不堪論淚點深宵劍有痕
九夏冰霜真國士卅年塵土舊公孫
綠車天上恩難再短褐揚州道自尊
一語請君重勘卻種瓜何必不青門

殘陽

殘陽淡餘影縹緲煙鐘聲偶爾竹林坐
不知溪月生遠峯望中隱空水吟邊明
撫絃不成弄心神秋與清

晚晴移詩匯卷八十六終